

## REVELATION

*Aevo'i jajivare jöhoje.*

<sup>1</sup> Aveho urimo subivahuadoho Iesu Kerisohu huruohoromo röjahuijade jöhoje. Eröjahuijade jöho God-ro Iesu bojамadeje huro hesi mu vaejaharue aribövioho röjahuijego noro garomo uvoröhego: God-ro nimo'ego majae ijonö ähi ähi jië'e muohuro nosi örire rue'ie'ajëjo. Eijonö rueröhe mu hesi jöho Kerisoro nosi örire röjahui'i nimoromo hesi aneraho uavamu huro barueromo John God-are mu vaejahaje aho röjahijadeje. <sup>2</sup> God-hu jövade jö Iesu Kerisohu mae röjahijamu John-hu gavadoho aho'o huhu mae jajivo barëjadoho aviaje. <sup>3</sup> Ae rahu ave surire jö adahë'o'ho o ave God-are örire jioromo rovade jö heromo rabe rabe jajivadoho ëho ejahë'o'ho iae huë mae bae'a'anue maja börömo'ho dunovë'ëro.

*John-hu God-are ekaresiae amo göre göre raromaruoho jejëmijade jöhoje.*

<sup>4</sup> O asë'e ekaresiae aho'obëhe 7 Asia sa'a hesi uhure amo göre göre raromobe rovarujohumë John naro jemesi örire jejëmije. Na nege God mami'e ähi jië'ëro hiemu hibe rovë'ëro jaruvohu'o ähi hijaje röhu ijonö ähi gemu hiemu hibe va'iröhe ë ahuro jemë huë baeromo ajëmijego maro raromo'irarijego. O na nege God-hu döre hijaje röho hesi nuninö raromarue Aru'ahe aho'obëhe 7 ëho jabu'o ähi gemuoho

jemesi örيره ajëmi'iröhego. <sup>5</sup> O na nege Iesu Kerisoro Vavu hesi jöhuremu ma-mae majahui-be rové'ëro guomoromo huro aevo'ioho ri'öromo hijë'ëro a masijo ioro'ioro ave sa'a muebejaruoho iosirëmiromo böröme namiromo muebejëvaje ë aho hu'o ëhi gemuoho ajëmi'iröhego.

Keriso hu mabëheje. Huro nosi örيره ue-horovavujëro jjië'ëro hesi köho otehoromo guomorovoromo ëhuro nosi sisëho u'ovahuadeje. <sup>6</sup> U'ovahuoromo ajamuiromo nosi ihoho döro bamahuamu ëhuro no masije riravoromo priest muoho baejë'e javue noro Keriso-are Böröme o Vavue God-are muoho vaenövoröhëni. Ëhi ajamuijë'ego ëhuni uvo'ejo: Hesi ihoho gemu börömoho höjo. Daruge aho'o hesiriremu höjo. Ae aho'obëhe no ëhi uvemu uvobe va'ëjarëjo. Iae mae.

<sup>7</sup> Gare. Iae hu suehu'o gemu mae ruvebi'ië'e. Ruvebi'iramu ae aho'obëhe röhu hu anare aribövioho jabu'o nunëro garuomo'ë'e. Garomo sa'ae aho'obëhe nierusuburu'e bamoruomo'ë'e. Ejöho iae mae. Iae ëhi jio'ë'e.

<sup>8</sup> Bada God-ro uëve: Na urimo ni'i'ivevadoho röhu ijo tugoho'ioho ëhi gemuoho jevo'ajëjo. Mami'e jiobe rovadoho röhu avevejö'oho ëhi jioromo röhu ijönöhu'o ëhi jiobe va'iröhe aho daruge aho'o jjië'e aho God-ro ëhi uëve.

*John-hu nia'ovo'iraeromo Keriso gavade jöhoje.*

<sup>9</sup> Röhu John na jemesi agane gemuoho jeve. Jemë'o na'o Iesuare ae gemuohuro javuë'ëro na jemë'o havoromo huë vavaene baeromo God-are aharire jiajëro hesi ajoho baeromo

baberumi namijajeje. Na motumotu hesi ihe Patmos ë remë'ejö rabëni God-hu jövade jö Iesuhu ma röjahuijadoho naehu majëhijajohuni. <sup>10</sup> Naro Patmos sa'are hiromo hura börömoho Bada uehorovarue majaho rovamu iae God-are Aru'ahohuro rumorovevoromo uehore boje-mamu hi'i hejodeje nasi dejonö jö'o ögohuro hëgö va'ëne ma-darugo'o rovavamu. <sup>11</sup> Jö'o ögohuro ma-darugo'o rueromo uevavohijo: Mue gö gö ga'amanuoho suri surioro jajivonëjo. Jajivoromo ekaresiae aho'obëhe 7 jabesi öroro nugö'önego adahego hebe va'irarëjo. Ephesus amo rajo ekaresiae Smyrna amo raje Pergamum amo raje Thyatira amo raje Sardis amo raje Philadelphia amo raje Laodicea amo raje ëho jabumëro adahobe hebe va'irarëjo.

<sup>12</sup> Ëhi jövamu hejë'i hunuorovodeje rahuhu na'o jöe jövajoho ga'i. Ë'i gavodeje iro bahijarue gije aho'obëhe 7 gold-ehu avoho'amë'oho ë momorö'öjamu <sup>13</sup> o iro bahijarue gije riravaje ririre a ma va'ëne aho niögu ëgobövi ba'amamu hörohu'o utahë'e gold-ehu avohë'e hisioho vinebire muoho taemë'e ëhi namijamu. <sup>14</sup> Ëa hesi simanohu'o simano uohu'o ajivoromo sa buse jahanovë'e jiohijo. Hesi nunoho vënëro höduvanovohijo. <sup>15</sup> Hesi höroho ajanie vënëro ravoromo ajivanovohijo. Huhu jö jövajoho jövëro ruomanovoromo ma-darugo'o uvavohijo. <sup>16</sup> Hesi övo mare jije aho'obëhe 7 jio'amohijo. Hesi jö'ore kaejö ëge anie ruë jio vië jië'e anio mama'e jiohijo. Hesi nu ano'oho majaehu höröromo ajivego gavaruëhi ëhi ajivë'e jiohijo. <sup>17</sup> Ajivë'e

jiamu gavë'i juhuonivoromo hesi hōru'ere be-  
 jevoromo hesi bēhire ae guomë'ohuro raro-  
 manovodeje. Raromamu hesi övo mahuro nasi  
 sinore bamehoromo uevadeje: Nadi juhuonivëjo.  
 Na aevo'i jevadoho röhu ijo tugoho'i jevo'ajëjo.  
 18 Na birivoromo hijaje ae jevajëjo. Urimo na  
 guomevade hōjo. Röhu gevëjo. Na ioro'ioremu  
 hiemu hijajëjo. Ioro'ioremu hiromo daru-  
 goho baej'ëro ëhu'ëro naehu uëvë'ohuro aëro  
 vuovoromo vuovë'e ariböviehu va'o raromaruire  
 ë va'o raromarue hōjo. O bogo uëvë'oho bogajo.  
 Na ëhi jië'e eni jevë'e ae jevajëjo. 19 Ëhuni  
 jaruvo jiaje muohu'o ijonö rueröhe muohu'o  
 jaehu ga'amanuoho ëho jajivo'amonëjo. 20 Röhu  
 jije aho'obëhe 7 nasi övo mare jio'amamu gavane  
 hesi jö subivahadoho o gold-ehu avoho'amë'e iro  
 gije aho'obëhe 7 ga'amane ë hesi jö subivahadoho  
 ë jöe niö'i jabesi bēhoho ma-sama'e huruoho  
 majahi'ië'ajëjo. Jije aho'obëhe 7 jabesi bēhoho  
 ekaresiae 7 jabumë muebejevobe va'arue anerae  
 jio'amajëjo. O iro gije 7 jabesi bēhoho ë ekaresia  
 7-ho jiobe va'ajëjo.

## 2

*Iesuhu Ephesus amore raromarue ekaresia  
 jabesi örire nugö'öjade jöhoje.*

1 Röhu Ephesus amore raromarue ekaresia  
 jabu'o hiromo muebejevaje anera hesi öroro  
 ave jöho jajivonego ekaresiae aho'o he'irarëjo.  
 Jajivoromo uënëjo: Nörö böröme namiromo  
 jije 7 övo mare ma'eno'amë'e iro gije 7 jabesi  
 ririre hi juvaje aho nöröro jöe majëhi'irögoro

ë'ajëjo. Uënëjo: Nöröro uvajëjo: <sup>2</sup> Jemesi muoho iae na gëvajëjo. I'u'e mu masijoho u'urume vae'ego gëvajëjo. O sisë aribövioho jemëro bogo ma-nunëremuoho gë'i ahëvo'ego gëvajëjo. Aëro jemë sarerëmiromo uëvare höjo: No apostle javuajë uëvaroho jemëro jabesi muoho mevoromo gëvarije höjo jabumë bogo apostle maehu jëvamu. <sup>3</sup> U'urume vaej'e jëvajëjo. Nasi jöëni vavaeni böröme baej'e jëvajëjo röhu bogo u'uvëvë'e höjo. <sup>4</sup> Ëhi jëvohijajo röhu avehuremu gë'ihöromo na bijönegajëjo. Rabëni jemë aevo'i rajehi avoho'ego gënövodëhioho avevej'oho bogo ëhioho ë'ego gëvajëjo. <sup>5</sup> Urimo dë vövöbajo'e aho'o rajehinövarijoho avevej'oho u'uhëhanovajoho ëho uehorovoromo sisëho vuonugo'i huotorovoromo urimo ë'onövarijëhi ëhi ë'onövorëjo. Bogo ëhi ë'ë'oho naro ö'oromo jemesi iro gijoho rori'o bava'ejöjo. Bogo huotorovoromo avoho rajehijë'oho iae na ëhi ë'ejöjo. <sup>6</sup> Iae ëhi höjo röhu aviëhi ë'arujoho iae mae höjo. Nicolaus-are ijore ijore jijiharue aribövi jabesi mu sisë naehu bijönimajëhi jemë'o ëhi gemuoho bijönimaruje höjo.

<sup>7</sup> Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjamu gavë'oho Iesu naro ja ua'ejöjo a i'ovëvo'iröhe ije God-are mure namijaje hesi bajoho i'iranego. Ahia mino'ëjo.

*Iesuhu Smyrna amore raromarue ekaresia jabesi örire nugö'öjade jöhoje.*

<sup>8</sup> O Smyrna amore raromarue ekaresia jabu'o hiromo muebejävaje anera hesi öroro ave jöho jajivonego ekaresiae aho'o he'irarëjo. Jajivoromo uënëjo: Aevo'i jiadoho ijo tugoho'i jioröhe aho guomadoho röhu maho i'ovade aho nöröro jöe majëhi'irögoro ë'ajëjo. Nöröro uvajëjo: <sup>9</sup> Jemesi huë vavaenoho iae na gëvajëjo. Jemë ave sa'a hesi mae sisë bogojëvajohu'o gëvajëjo. Röhu dë vövöbajo'o uhure bövi mae baejë'e jëvajëjo. Amo jemë agëvarue aribövi jabesi jö sisëho ëhu'o gavajëjo. Jaburo uvarue höjo: No Jew raje javuajëjo röhu Jew rajehu God-are aribövi jiaruëhioho jabumë bogo ëhioho jio'i Satan-are aribövie jioruomajëjo. <sup>10</sup> Jemë vi'ehe huë vavaene bae'ië'arujoho nadi juhuonivorëjo. Gahëjo. Iae Satan-ro ae uë'a'ajëjo jaburo jemë ae gö gö savoji gagore ba'amëvego huro jemesi dëho bijioho gëröhëro. Ëhi'o'iramu huë vavaene baebe va'ojuvo majae ma-bisemu barë'iramu barëjëho'ajëjo. Röhu biririvemu biririvamu vuovëvë'iroho ioro'ioremu raromo'irarije suvuoroho naro bojëmi'ejöjo ruahö'öjarijohuni.

<sup>11</sup> Ae rahu ja God-are jö hejanue ae javë'oho nasi Aru'ahëhu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjë'oho sinoho guomavo'iramu ijonöho aru'ahoho bogo guomavoromo sisëroho va'i maro hi'a'anuejo. Ahia mino'ëjo.

*Iesuhu Pergamum amore raromarue ekaresia jabesi örire nugö'öjade jöhoje.*

12 O Pergamum amore raromarue ekaresia jabu'o hiromo muebejevaje anera hesi öroro jajivonego ekaresiae aho'o he'irarëjo. Jajiv-  
 oromo uënëjo: Kaejō ēge anie ruē jio viē  
 jiē'e anio ma-ma'e jō'ore jiē'e aho nörōro jōe  
 majēhi'iē'ajējo. <sup>13</sup> Vaevē'e diehi jiē'e amore raro-  
 marujoho iae na gēvajējo. Satan hu ē amore  
 a bōrōme vaeromo muebejevaje hōjo. Ēhi hōjo  
 röhu nasi ekaresia aribövioho jemēro biririv-  
 oromo nasi ihoho ma'enaruje hōjo. Urimē'i  
 Antipas-ro nasi jōho mae majēhijamu hegoro-  
 vo ē Satan-hu hijajire raromarue amo rajohuro hu  
 anamu guomade hōjo. Guomamu röhu jemēhu  
 nasi örire mae uehorovevarijoho bogo vuonu-  
 garije hōjo. <sup>14</sup> Ēhi hōjo röhu avehuremu bogo  
 maehu jio'i sisē hōjo. Jasi ekaresia aribövie  
 göēro göēro Balaam-hu mu sisē vaejadēhi ēhi  
 gemuoho vaejarue hōjo. Ēhesi bēhoho urimē'i  
 Balaam-ro a bōrōmo hesi ihe Balak rōjahiromo  
 uavade hōjo: Jero ēhi'oromo Israel rajoho sar-  
 erēminego sisēro revo'irajo. Balaam-ro jō sisēho  
 ēhi rōjahijamu hegoro-vo rue a bōrōmohuro eja-  
 horomo Israel rajoho dinēmijamu jaburo God-  
 are jōho ahoromo uvare hōjo: Inōme gö gö  
 aru'aho'e hōromo rajahiromo mioho ē inōmo  
 inōmohuni bahijēhoromo vituoho ue'ahoromo  
 öēro jijihanovoruomade hōjo. Balaam-ro ēhi  
 jiē'e mu sisēho rōjahade hōjo. <sup>15</sup> Balaam-hu  
 mu sisē urimo rōjēhijadēhi jaruvo-vo ēhi jiē'e  
 mu sisēho Nicolaus-ro rōjēhijego ae gö jemesirire  
 raromaruohuro hesi ijore ijore jijihoromo mu  
 sisē vaejarue hōjo. Mu sisē vaejego jemēro ma-

raromoromo nunëremu gëvaruje höjo. <sup>16</sup> Èhi jiè'e mu sisë ma-nunëremu gëvarujoho vuonugoli ë mu sisëho ahëvohëjo. Bogo ahëvë'o ho naro ma-burëro ö'ejöjo. Ö'oromo nasi jö'ore jiaje kaejöho baeromo ë sisë ariböviohu'o muorovo'ejöjo.

<sup>17</sup> Ae rahu ja God-are jö hejanue ae javë'o ho nasi Aru'ahehu ekaresia majëhibe rovaje jöho heromo avoho uehorovonëjo.

Ae rahu biririvoromo mu sisë ruahö'öjamu gavë'o ho naro suvuore bojami'ejöjo. Suvuoro hesi bëhoho urimë'i God-are ariböviehu a rumo'e sa'are jijihamu God-hu muebejëvoromo ö'idöre jiaje i i'imëmijadëhi naro ja ëhi muebejavoromo gurihijë'e ö'idöre jiaje ioho i'imami'ejöjo i'iranego. Ö'idöre jiaje ioho i'imamiromo ajivë'e munëho bojami'ejöjo. Ëmunë hesi döre iho i'le jajivë'e jio'a'ajëjo. Èihoho jasi sivue ga'a'anuejo. A göho bogajo. Ahia mino'ëjo.

*Iesuhu Thyatira amore raromarue ekaresia jabesi örire nugö'öjade jöhoje.*

<sup>18</sup> O Thyatira amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: God-are Harihe nunire vënehu höduvanovoromo hörure ajani vënehu ravoromo ajivanovaje aho nöröro jöe majëhi'ië'ajëjo. <sup>19</sup> Iae na gavajoho jemë mu mae vaejaruje höjo. Jemë na'o a ioro'iorohu'o rajahuiromo na mae uehorovevoromo nasi muoho vaejehoromo muoho u'urume vaejë'i biririvaruje höjo. Urimoho mu mae ma-bisemu vaejarijoho jaruvoho börömo bëhe vaejaruje höjo. <sup>20</sup> Iae



ëhi gavajëjo röhu avehuremu gë'ihöromo na  
 bijönegajëjo. Magonahe gemu Jezebel-hu urimë'i  
 hiromo mu sisë barovadëhi magonahe gemuëro  
 jemë'o hiromo mu sisëho ëhi gemuoho barovaje  
 höjo. Mu sisëho barovego jemëro bogo aho'i ma-  
 nunëremu gavaruje höjo. Ma-nunëremu gavego  
 ë magonahohuro jemë'o hiromo sarerëmiromo  
 uëvaje höjo: Na jö God-aro baeromo majëhijaje  
 magonahe jevajëromo Iesu nasi mu vaejeharue  
 aribövioho sareri sareri'e jöho röjëhiromo uëvaje  
 höjo: A'o magonaho'o ëma sihamirovë'o'oho iae  
 mae höjo. O inöme gö gö aru'aho'e jio'amajëromo  
 jabumëni bahijëhare mi ue'ahë'o'oho iae mae  
 höjo. Ëhi jië'e sareri'e jöho majëhijego nasi  
 aribövi ioro'iorohuro uvarue höjo: Hesi jöho  
 mae höromo ejaharue höjo. <sup>21</sup> Ëhi ë'ë'e höjo röhu  
 Iesu naro bogo burëroho i'uoho bojami'i ma-  
 muebejë'e jevajëjo huro uehoro sisëho vuonugo'i  
 uehoro mae baeröhego. Röhu önö'e mu sisë  
 röjëhijajoho vuonugo'iröhoho bijönimajëjo.  
<sup>22</sup> Bijönimë'ego ëhuni iae Iesu naro i'ue mana  
 bojami'iramu guomo guome baeromo röhoremu  
 raromo'ajëjo. Raromo'iramu ë magonahohu'o  
 önö'e jijihaje aribövioho jabu'o ëhi vi'ehe  
 böröme bae'a'aruëjo. Jabumë ë magonaho  
 hesi jö ejaho'i bogo vuonugë'o'oho ëhi jië'e  
 vi'ehi börömoho bojëmi'ejöjo. <sup>23</sup> O ë magonaho  
 hesi ijore ijore jijiharue aboji harihu'o'oho  
 Iesu naro muo'amo'iramu vuovëvo'ajëjo.  
 Vuovëvo'iramu gagorovo ekaresiae aho'obëhe  
 amo göre göre uvobe va'oruomo'ajëjo: Nöröro  
 ae aho'obëhe nosi simanoho dë vövöbajö'oho

mevavuo barējaje hōjo gö'i mae o sisē javuego. Mevavuo göromo nosi mu diehi vaejarue hesi manaho ēhi bojamui'ajējo. Ekaresiaēro ēhi uehorovoruomo'ajējo.

<sup>24</sup> Rōhu Thyatira amo rajo a ioro'ioroho jemēro ē magonaho hesi jō sisēho bogo ejaharuje hōjo. O hesi aribōviehu uēvaruoho: Satan-are uhu jō hesi bēhoho no baejaroho jemē'o baerē uēvaruoho jemē bogo ejēharuje hōjo. Bogo ejēharujohuni ēhuni Iesu naro jemesi ōrire ave jōho uē'iē'ajējo. Jemē mu bōrōme baejē'ego ē hesi dōroho muoho bogo gö'oho bojēmi'ejōjo. <sup>25</sup> Rōhu ē mu baejarijoho biririvoromo ma'enegro Iesu na ō'irōjo. <sup>26</sup> Ae rahu mu sisē ruahō'ōromo biririvoromo nasi mu ma'enobe va'ujuvo jasi maja barējē'oho naro ja daruge bojami'iramu sa'ae aho'o muebejēvo'anuējo. <sup>27</sup> Sa'ae gö gö muebejēvoromo aehu rama anoromo hahovaruehi jero ēhi ha'itoho baeromo vōrō'o muebejēvo'anuējo. Naehu ēhi'oromo sa'ae gö gö muebejēvo'irodego nasi Vavuehu uevadēhi naro ja ēhi ua'ejōjo sa'ae gö gö vōrō'o muebejēvo'iranego. <sup>28</sup> Naro ēhi uaromo sisonu'e gavarue mujōru hesi ajoho bojami'ejōjo.

<sup>29</sup> Ae rahu ja God-are jō hejanue ae javē'oho nasi Aru'ahehu ekaresia majēhibe rovaje jōho heromo avoho uehorovonējo. Ahia mino'ējo.

### 3

*Iesuhu Sardis amore raromarue ekaresia jabesi ōrire nugō'ōjade jōhoje.*

<sup>1</sup> O Sardis amore raromarue ekaresia jabu'o hiromo muebejevaje anera hesi öröro jajivonego ekaresiae aho'o he'irarëjo. Böröme namiromo God-are Aru'ahe aho'obëhe 7 o jije aho'obëhe 7 baejë'e aho nöröro jöe majëhi'ie'ajëjo. Jemëhu mu vaejarujoho iae na gavajëjo. Na gava-joho ae aho'obëhe uvoruomaje höjo: Sardis ekaresiaho jemëro God-are daruge baeromo mae raromaruje höjo. Jemesi jöho ëhi atarue höjo. Röhu jemë bogo ëhioho jëvo'i jemesi aru'ahoho God-are darugo rumo'ëro jiehë'ëro vuovëhë'e höjo. <sup>2</sup> Ëhuni ri'ö nune dadovohëjo. Vëni duoroho'ie'ajoho mueberomo huego avoho ravo'irajo. Duoroho barëjëho'ajëjo. Na gava-joho nasi A Börömoho God-ro uvaje höjo: Jemesi muoho bogo maehu höjo. <sup>3</sup> Ëhuni Christian jö rabe majëhijamu hejarijoho avo'avoho uehorovoromo eromo uehoro sisëho vuonugohëjo. Bogo ri'ö nuni dadovoromo avoho uehorovë'oho naro vajiohëro ö'ejöjo. Naehu ö'irode majaho bogo mae bogo ga'a'arujëjo. <sup>4</sup> Jemë ëhi jëvajëjo röhu jemesi Sardis amo raje ae gemu gemu jabesi niögoho avo'avoho muebejë'ëro va'inumoho bogojëhajëjo. Ëaribövioho maëro jëvë'ëro ëhuni ajivë'e niögoho io'amoromo na'o gemu mae jijiho'aruëjo. <sup>5</sup> Ae rahu biririvoromo mu sisë ruahö'öjë'oho ajivë'e niögoho ëhi ba'amo'anuejo. O jasi ihoho mae raromemu raromo'iröhe aribövi jabesi surire jajivodoho na bogo mu'uvaho'ejöjo. Bogo mu'uvaho'i a'i naro nasi Vavu hesi nunire o anera jabesi nunire namiromo jasi ihoho masamae majëhiromo uë'ejöjo: Ave aho nasi a maho

höjo.

<sup>6</sup> Ae rahu ja God-are jö hejanue ae javë'oho nasi Aru'ahehu ekaresia majëhibe rovaje jöho heromo avoho uehorovonëjo. Ahia mino'ëjo.

*Iesuhu Philadelphia amore raromarue ekaresia jabesi örire nugö'öjade jöhoje.*

<sup>7</sup> O Philadelphia amore raromarue ekaresia jabu'ohiromo muebejëvaje anera hesi öroro jajivonego ekaresiae aho'ohi he'irarëjo. Jajivoromo uënëjo: Bogo sisëho bogo sareri'oho jio'ohi ma-maëremu jiaje aho nöröro jöe majëhi'ie'ajëjo. David-hu böröme namiromo God-are öri ari'ere va'iröhe öroho muebejadëhi naro ëhi muebejaje höjo. Naehu öri jiovë'iroho ae göehu tugohö'iröhoho bogo eni höjo. O naehu tugohë'iroho ae göehu jiovo'iröhoho bogo eni höjo. Ëhi jïë'e a börömoho Iesu naro jöe majëhi'ie'ajëjo. <sup>8</sup> Jemëhu mu vaejarujoho iae na gëvajëjo. Hehëjo. Naro mu öroho jemëni jiovëhë'e jevajëjo. Jiovëhë'ëro ae göehu tugohëho'iröhoho bogo eni höjo. Iae na gavajoho jemesi darugoho bogo bövioho jïë'e jemëro nasi jöho ejehoromo nasi ihoho ae aho'ohi jabesi nunire huruoho majëhiromo uëvë'e jëvajëjo: Iae no Iesuarue aribövie javuajëjo. <sup>9</sup> Iae Satan-are ariböviohuro jemesi amore raromoromo uvoruomaje höjo: No Jew raje javuajëjo. Röhu Jew rajehu God-are aribövi jiaruëhioho jabumë bogo ëhioho God-are aribövioho jio'ohi Satan-are aribövie jioruomajëjo. Röhu hehëjo. Naro jabumë ruahö'öjëvo'iramu jaburo ö'oromo jemesi hörünö ague aho raromoromo gëromo

uvoruomo'ajëjo: Jemë Iesuhu rajëhaje aribövie jëvajëjo. <sup>10</sup> Nasi örohuni jemë u'urume vaejë'i biririvonövo'irarijego uëvode höjo. Ëjöho jemëro ma'enë'e jëvo'lego ëhuni naro jemë ma'enëgo'ejöjo. Ma'enëgo'iramu huë vavaene sa'ae dinö'e dinö'e rueromo ae aho'o jemesi dëre bijiohë'iroho jemë mae riravo'arujëjo.

<sup>11</sup> Naehu rue'irode majaho dunovajëjo. Ëhuni jemëhu baejarije mu maho nadi vuonugo'i mavoho mueberëjo ëhuro aho bogo iosirëmiromo jemesi suvuoroho baejëho'iröhe höjo. <sup>12</sup> Ae rahu biririvoromo mu sisë ruahö'öjë'oho naro baejavoromo nasi A Böröme God-are osare bamavo'iramu bönunö'e bibivoromo namijanovo'anuejjo bogo ijoho rori'o va'iranëro. O nasi A Böröme God-are ihoho jasi sinore jajivaho'ejöjo ja hesiremu javoröhego. O nasi A Böröme God-are amo hesi ihoho sinore jajivaho'ejöjo. ËJerusalem amo i'oho nasi A Böröme God-hu hijajire ö'idöre jioromo ruvebi'iröhoho ë amo hesi ihoho uavajëjo. O nasi iho i'ohu'o jasi sinore jajivaho'ejöjo.

<sup>13</sup> Ae rahu ja God-are jö hejanue ae javë'oho nasi Aru'ahëhu ekaresia majëhibe rovaje jöho heromo avoho uehorovonëjo. Ahia mino'ëjo.

*Iesuhu Laodicea amore raromarue ekaresia jabesi örire nugö'öjade jöhoje.*

<sup>14</sup> O Laodicea amore raromarue ekaresia jabu'o hiromo muebejëvaje anera hesi öroro jajivonego ekaresiae aho'o he'irarëjo. Jajivoromo uënëjo: Mae jövaje aho na jevë'lego God-are jöho maro

maro huruoho majëhijaje aho na jevajëjo. Godhu bövi bise'lo bamadoho uevamu avoho'amode aho Iesu naro jöe majëhi'ie'ajëjo. <sup>15</sup> Jemesi muoho iae na gëvajëjo. Jemë naniho bogo nëgo avohaje höjo bogo bijönëgo avohaje höjo. Nëgo avoho'ibejajo o bijönëgo avoho'ibejajo na mae jevo'ibejajo. <sup>16</sup> Röhu bogo nëgo avoho'i bogo bijönëgo avoho'i uehore ma-ririre jëvajohuni ëhuni sabon'e ijuh'öjëvo'ejöjo. <sup>17</sup> Jemëro uvaruje höjo: Nosi sivue bövie bise'e eni javuajëjo. Marohë'e mae javuajëjo. Böviëni bise'ënioho bogo vavaenoho baejarue höjo. Ëhi ataruje höjo. Röhu jemesi uhuroho bogo ëhioho jëvajëjo. Jemë vaevë'e huë vavaeni'e bövi bise'lo rumo'e nuni sisë'e ma-sinëremu raromarujëjo. Ëhi jëvajoho ëho bogo gavarujëjo. <sup>18</sup> Ëhuni ave öri avoho röjëhi'ie'ajoho avoho herëjo. Nasi gold ma-mabëhe ajivë'oho nasiro imoromo jemesi ujuohorego marohë'e mae jëvo'irajo. Ajivë'e niögoho nasiro imoromo io'amego sinëremu raromoromo a nunire javoji'e mu vaejarujoho tugohego mae jëvo'irajo. Nuni hesi osoho imoromo rue jemesi nuni maro buerovego jemesi simanoho ajivëvego avoho uehorovo'irarije höjo. <sup>19</sup> Röhu naehu huë baejëvaje aribövioho i'ue bojëmiromo avo'avoho röjëhijaje höjo sisëho vuonugo'i ma-avoho jijih'o'irarijeho. Ëhuni jemëro nimo avohoromo huotorovoromo uehoro maemu baerëjo. <sup>20</sup> Hehëjo. Naro osare ö'irögoro amonö namiromo jemesi ojore ano'anovajëjo. Ae rahu nasi huë heromo ojo jiovehë'oho naro rumo ö'oromo ja'o hiromo gemuoro ioho i'ejarëjo.

21 Ae rahu birivoromo mu sisë ruahö'öjè'o ho urimo naehu birivoromo sisë ruahö'öromo ajiomoromo nasi Vavu hesi röho mare hu'o gemu mae hijè'ëro bövi bise'o muebejèvjèhi naro èhi ja ua'iramu nasi röho mare ö'oromo na'o gemu mae hiromo na ajemiromo bövioho bise'oho muebe'amo'anuëjo.

22 Ae rahu ja God-are jö hejanue ae javè'oho nasi Aru'ahèhu ekaresia majèhibe rovaje jöho heromo avoho uehorovonëjo. Ahia mino'ëjo.

## 4

*Ö'idöre raromoromo God rajahiruomaje jöhoje.*

1 Èhi'amu naro ga'i gavodeje ö'idöre va'arue ojoho jiovo nugè'e jiamu. Jiovo nugè'e jiamu gagorovo hejode hëgöehu uvanovaje urimo jö majehijade ahuro röhu maho ma-darugo'o jöe majehiromo uevavamu: Avehuro rojomego ijonö mu diehi diehi jio'iröhoho na röjahijöjo.

2 Èhi uevamu hejè'i God-are Aru'ahohuro na avohevoromo simanoho huotoveho barëjambu gavè'i naro ö'idöre muoho garomo gavodeje a börömèhu hijaje röho ö'idöre jiamu. Èhi jio'ego ae gemu è hihijo. 3 Hi'ego munè mabèhe gö gö kavuè'e ajivè'e jio'amoromo jinojino'irae'amajèhi hesi nu ano'oho èhi jinojino'iræhijo. Röhu nuogëro röho numohijo. Munèhu mabèhe rövajèhi nuogohuro nomoromo èhi rövohijo. 4 Èröho maho ririre jio'i a duvahe aho'obèhe 24 ruë numë gemu gemu röho mare raromo rova'oruomohijo.

Ajivë'e niögoho io'amoruumë'e a masijehu didi'aruëhi jië'e bosöe gold-ehu avoho'amaroho simanore didi'oruomë'e ëhi raromohijo. <sup>5</sup> Röhu ririre röhere baderivo'ego varuru vajerile vae'i hijavohijo. O ë röho ma hesi nuninö iro buno'irae'amadoho aho'obëhe 7 kavuo'amohijo. Ëiro jabesi bëhoho God-are Aru'ahe aho'obëhe 7-hoje. <sup>6</sup> O röho ma hesi nuninöho jovo e'u deri va'ëne ajivo avohë'e börömo böröme jiohijo.

O röhoho ririre jio'i God rajahjarue maje 4-ho ioni göre ioni göre dejonö nuninö ëhi riravo rova'oruomohijo. Nu ano'e ruë numë manunemu jioruehijo. <sup>7</sup> Ëmajoho göho lion va'ëne jio'i göho cow ano'e harihu va'ëne jio'i göho ma-a nu ano'o va'ëne jio'i göho buruhehu hetejogo gavaruëhi hesi nu ano'o ho ëhi jiohijo. <sup>8</sup> God rajahjarue maje 4-ho gemu gemu vivoje aho'obëhe 6 6 jio'amohijo. Jabesi vivoju uhohu'o dönöhu'o sino haho'o ho aho'o manunemu jio'amohijo. Röhu majae vahie sisone bogo vuonugë'e ma-jöe iemu ioromo uvarueje:

Bada God maemu maemu maemu jio'i daruge aho'obëhe hesirohemu höjo.

Mami'e jiobe rovdoho jaruvo jiajoho röhu ijonö jio'iröhoho höjo.

<sup>9</sup> God rajahjarue majohuro God ëhi ma-mabëhe rajahiromo jöho iarueje röho mare hiromo ioro'ioremu hibe va'aje a hesi ihoho dö maro jioröhego. <sup>10</sup> Ëmaje 4-ehu ëhi rajahiromo jö ië'iroho rue a duvahoho aho'obëhe 24 jaburo röho mare hijaje a hesi nuninö ague aho raromoromo hesi örire rajahjarueje hu ioro'ioremu



hibe va'aje jië'ego. Rajahiromo jabesi a masijehu simanore didi'arue bosöho God-hu hijaje nuninö rideho bahijarueje. Bahiromo uavarueje:

<sup>11</sup> Nosi Bada God jero bövie bise'e bamane höjo.

Jero nimoromo avohë'ëro jio'amajëjo.

Ëhuro ja mae javë'ego iho böröme aje aho'o daruge aho'o jasi gemu höjo.

## 5

*Huhohë'e sure God-are Sheep Harihe Iesu gemuehu jiovo varijëne jöhoje.*

<sup>1</sup> Ëhi'amu gavodeje röho mare hiromo muebejavuaje aho God-ro hesi övo mahuro huhohë'e suroho ma'enë'e jiamu. Ësuroho ruë jajivo vië jajivoromo huhohoromo sivaëro aho'o 7 ëmino'e suroho badihi taemo'amë'e jiohijo. <sup>2</sup> O gavodeje darugo'e anerahuro ma-darugo'o uvamu: Rahu a böröme javë'o ho badihi taemo'amade sivaho goho'amoromo suri jiovo'iranoho eni javajëjo.

<sup>3</sup> Ëhi uvamu röhu ö'idöre sa'are sa'a uhure ëhi jië'e a börömoho nahoromo bogo mae bogo birohareje huhu ë suri jiovoromo adaho'iröhoho.

<sup>4</sup> Ëhi jië'e aho bogo birohamu ëhuni na sisë maro nivodeje. <sup>5</sup> Nivamu a duvahe gemuëro uevadeje: Nadi nivo'i ave jöho hejëjo. A böröme gemu iae eni jiajëjo. Lion-hu mi ioro'ioro iosirëmiromo darugo'e jiajëhi huro Judah rajo ioro'ioroho ëhi iosirëmiromo darugo ma'e höjo. David urimo hinövade a hesi ujo böröme höjo. Ëahuro sisëho ruahö'öjë'ëro sivae 7 goho'amoromo suri jiovä'o ho hu eni höjo.

<sup>6</sup> Eni hōjamu hejē'i gavodeje Sheep Harihoho namijamu. Mami'e aëro anamu guomē'ëro sinore batato'e jiē'e ēhi namijamu. A duvahoho ruē numē riravo rova'ego God rajahjarue maje 4-ho ruē numē riravo rova'ego ē Sheep Harihoho riri mare God-are rōho ma hesi ririre namihijo. ĒSheep-oho dane aho'obēhe <sup>7</sup> o nune aho'obēhe <sup>7</sup> ēhi jio'amohijo. Ēnune aho'obēhe <sup>7</sup> jabesi bēhoho God-are Aru'ahe <sup>7</sup> sa'ae dinō'e dinō'e rēmō'ōjadohoje. <sup>7</sup> Amo ē Sheep Harihohuro rueromo rōho mare hijaje aho God hesi övo mare jiaje suroho baehijo. <sup>8</sup> Suroho bae'ego God rajahjarue maje 4-ho a duvahe aho'obēhe 24-ho jaburo Sheep Harihu hesi nuninō sa'are ague aho raromohijo. Jabumē gemu gemu gita övore ujuohē'e gold'e ramare ridi'e buejarue vëni u'oho ujuohē'e jiohijo. Ridi'e buejarue vëni u'i hesi bēhoho God-are ariböviehu hesi örire atarue jō'o ögohoje. Gita'o ramare vëni u'ohu'o ujuohē'e ague aho raromoromo <sup>9</sup> jō i'oho ioromo uaruumohijo:

Ja maëremu javē'ëro ēhuni suri baeromo siva goho'amē'oho eni javajëjo.

Aëro anagamu jasi köho otehoromo guomane hōjo. Guomoromo ēhuro ae ajëmijane hōjo.

Agane gö gö huē gö gö sine gö gö sa'ae dinō'e dinō'e sisē'i raromaroho

jero guomoromo ēhuro imëvoromo baejëvoromo God-arinō rëmane hōjo.

<sup>10</sup> God-arinō rëmoromo jabesi ihoho dōro bamëhamu

ēhuro jabumē masije riravoromo priest muoho baejare hōjo

nosi A Böröme God hesi muoho vaenövoröhëni.  
 Priest muoho baejë'ëro ijonö masije vaeromo  
 sa'are ae muebejëvoruomo'ajëjo.

11 Ëhi uaruomamu naro garomo hejodeje an-  
 erae aho'obëhe mae bogo adaho varijënoho  
 uvoruomamu. God-are röho maho o God  
 rajahjarue majoho o a duvahoho ëho ririro  
 jio'amo'i ë aneraho aho'obëhe ruë numë raromo  
 rova'oruomohijo. 12 Raromo rova'oromo ma-  
 darugo'o uvoruomohijo:

Anamu guomade Sheep-oho mae höjo.

Ëhu'ëro darugo maho inömo inöme aho'o uehoro  
 maho vörö maho

iho maho aji maho ma-hesiro gemu höjo.

Noro hu gemu rajahi'ëjarëjo.

13 Ëhi uvoruomamu hegorovo hejodeje God-hu  
 bamade bövie bise'e ö'idöre sa'are sa'a uhure  
 jovo gagore raromaruoho ëho jaburo aho'obëhe  
 uvoruomavamu:

God röho mare hijaje ahu'o Sheep Harihohu'o  
 iho maho aji maho darugo maho ma-jabesiro  
 gemu höjo.

Ëhi jiemu jiobe va'ië'ego jabumë gemu rajëhiemu  
 rajëhinövo'ëjarëjo.

14 Ëhi uvoruomamu hegorovo rue God rajahi-  
 jarue maje 4-ho jaburo uvoruomohijo: Ëjöho  
 iae mae-ëjo. O a duvahoho jaburo sa'are  
 ague aho raromoromo God'o Sheep Harihohu'o  
 rajëhiruomohijo. jöhoje.

## 6

*Suri badihi taemë'e siva dadovobe va'ade*

1 Ëhi'oruomamu gagorovo gavodeje surire sivae 7 badihjaroho gemu Sheep Harihohuro aevoromo gohamu. Gohamu evare hejodeje God rajahijarue maje 4-ho röhu gemuëro varurehu anajëhi ëhi uvavamu: Rovëjo. 2 Rovëjamu hegorovo ga'i gavodeje sino ajivë'e horse jiamu. Röhu ë horse hesi döre hijade aho pevae ma'enohijo. Mami'e muorovoromo ruahö'öjë'ego bosö mabëhoho hesi simanore didi'ahohijo. Didi'aho'ego va'ohijo muorovoromo huro muorove aho'o ruahö'ö'amo'iröhëni.

3 Ëhi'ego Sheep Harihehu urimo surire sivae gemu gohadoho röhu number 2-oho gohohijo. Jiovamu evare hejodeje God rajahijaje majo göhuro uvavamu: Rovëjo. 4 Rovë'ego ae sino kavuo avohë'e horse-re ruehijo. Rueromo vöröe bojami'ego baehijo ëhuro sa'ae gö gö huë mae baerovarue muoho ijumëhego ae göëro göho muo'amo'iröhego. Ëhi ë'iröhego muorovarue kaejö ëgoho hesi örire bojamihijo.

5 Ëhi'ego Sheep Harihehu urimo surire sivae niö'i gohadoho röhu number 3-oho gohohijo. Gohamu evare hejodeje God rajahijaje majo göhuro uvavamu: Rovëjo. Rovëjamu naro ga'i gavodeje ae rövë'e horse-re hiromo i'u gavarue inömoho baejë'e rovamu sa'a hesi iruno'oho ga'iröhëro i'ue dimino'e jiego. 6 Ae rövë'e horse-re hiromo i'u gavarue inömoho baejë'e rovamu gagoro hejodeje God rajahijarue majo jabesi ririre jioromo aëro jövanovoromo sino rövë'e horse-re rovade a hesi örire uavavamu:

Jero sa'a iruno'e ijumo'anuëjo. Ijumo'iramu iruno'oho sisërëromo bogojianovo'ajëjo. Ioho bogojianovo'iramu ëhuro hesi manaho ajiomo'ajëjo. Ajiomo'iramu aehu i imo'ië'iroho majae gemu hesi mu vaejare manaho bu'ö barëromo ëhuro majae gemu hesi iruno'o maho o majae niö'i gemu hesi iruno'o sisëho ujuoho'aruëjo. Suvuoroho ëmino'e ajiomo'ajëjo. Röhu jaehu iruno'o ijumë'oho olive ijo bajohu'o grape ö'i bajohu'o bogave ijumo'iranëjo.

<sup>7</sup> Ëhi'ego Sheep Harihehu urimo surire sivae niö'i gemu gohadoho röhu number 4-ho gohohijo. Gohamu evare hejodeje God rajahijaje majo göhuro uvavamu: Rovëjo. <sup>8</sup> Rovëjamu hegorovo ga'i gavodeje ae sino jio'ajivë'e horse-re rovamu. Jio'ajivë'e horse-re rovade a hesi ihoho A Vuovëvo'iröhe Aho jiadeje. O ae gö hesi ijore rühijo. Hesi ihoho Vuovë'e Aribövi Raromarue Öri ari'oho jiadeje. Jabu niö'i vöröe bojëmi'ego baehijo sa'ae aho'obëhe tariojego ëhi niö'i ëhi niö'i jiego jaburo gemu baeröhëni. Gemu baeromo ijumëvego göëro göhu'o muorovoromo vuovoröhego. Ie barëromo vuovoröhego. Guomo guomo sisë baeromo vuovoröhego. Je'ö miëro umijego vuovoröhego.

<sup>9</sup> Ëhi'ego Sheep Harihohuro urimo surire sivae 4 gohadoho röhu number 5-ho gohohijo. Gohamu evare gavodeje vuovëvë'e a jabesi aru'ahoho God-ni suvuro bahijarue maratu bëhire sa'are raromamu. Ëraromare hesi bëhoho urimoho ë ariböviohuro God-are jöho uehorovoromo biririvoromo majëhinövareje.

God-are jöho biririvoromo majëhijamu gagorovo aëro muo'amamu vuovëvadeje. Muo'amamu vuovëvë'ëro ëhu'ëro jabesi aru'ahoho ë raromohijo. <sup>10</sup> Raromoromo ma-darugo'o uvoruomohijo: O asë'e Bada ja darugo eni jïë'e ae javajëjo. Ja mu sisëho bogo vaejanue o sareri'e jöho bogo jövanue a ma-maemu javajëjo. Röhu ë sa'are raromarue ariböviohuro no bijuëmavuare höjo. Ëhuni ja majae dimino'e ma-nunëremuoho gëbe va'oromo evare ë jabesi mu sisëho mevo gëromu i'uoho mana bojëminëjo. <sup>11</sup> I'uoho mana bojëminëjamu ajivë'e niögu ëgoho ë aribövioho suvuorëmi'ego ujuohoruomohijo. Ujuohoromo hejareje uëvavamu: Majae ma-bisemu ëgo'o nuhanovorëjo hujeji jemë muo'amëvarëhi jemë'o nasi mu vaejarue ö mueno'o aehu muo'amego vuovoröhe aribövi ioro'ioroho rue barëjego evare i'uoho mana bojëmi'irode höjo.

<sup>12</sup> Ëhi'ego Sheep Harihehu urimo surire sivaë övo gö mine gohadoho röhu number 6-ho gohohijo. Gohamu evare gavodeje sa'aho börömo böröme hijiohijiovamu. Sa'aho hijiohijiovo'ego niögu sisë rövë'e jiajëhi maja nunohuro ëhi rövo'ego manaerohuro kö va'ëne kavuohijo. <sup>13</sup> Manaerohuro kavuo'ego buru börömehu rueromo meso hijiovego meso böso i'ehu rireromo ruvebijajëhi jiji mujöru'ohuro ëhi sa'are rireromo ruvebihijo. <sup>14</sup> Rireromo ruvebi'ego aehu suri huhohëgo bogo gavaruëhi ö'idöhuro ëhi arorovoromo sisërë va'ohijo. Dahore aho'obëhe o sa'a dirö dirö'e jovore jio'amajoho aho'obëhe arua anumiae va'ohijo. <sup>15</sup> Arua anumiae

va'ego sa'are a masijo masijoho a duvaho ioro'ioroho muorovo a masijoho inömo marohë'e aribövioho darugo'e aribövioho a jabesi muemu vaejarue aribövioho jabesi nimoro mu vaejarue aribövioho ëhi ae aho'o huruomo va'oromo juju gagore dahorure munë burure gurihirovo barëhijo. <sup>16</sup> Gurihirovo barëromo uvoruomohijo: Dahoroho munëho jemëro ahoromo urahahuego ëhuro röho mare börömo hijaje ae God bogo gö'irajo. O Sheep Harihu hesi vöröho no bogo baejavuo'irajo. <sup>17</sup> Ëhesi bëhoho vörö majaho rovë'e höjo. Raro ë vöröho uraho nami'a'ajëjo.

## 7

*God-hu hesi aribövie 144,000 avoho mue-bejëvadejöheje.*

<sup>1</sup> Ëhi'amu gavodeje anerae 4 riravamu. Sa'ae aho'o dinö'e dinö'e jiajoho ririre jio'i jabumë aruhiae anumiae aruae aviae riravo rova'ohijo. Riravo rova'oromo anerae gemuëro gemuëro burehu rovajoho gemu gemu tugohohijo buroho bogo rueromo sa'aho jovoho ijoho huosihoröhego. <sup>2</sup> Buroho ëhi tugohamu gagorovo na gavodeje anerae göëro aruhe maja rojomajire jioromo rojomamu. Rojomoromo God darugo'ehu hijaje hesi jajivarue inömoho hesi övëro bæjë'e ruehijo ëhuro God-are aribövi jabesi sinore taemöhego jaji'e jio'amo'iröhego. Rueromo ma-darugo'o uvohijo rue anerae 4-ho jaburo hejëro mami'e sa'a'o sö jovo'o ijumo'iröhe vöröho God-aro baeruumë'ëro. <sup>3</sup> Uvoro mo uvohijo: Jemëro sa'aho jovoho

ijoho nadi vejö'oho ijumo'amohëjo. Hujeji God-are mu vaejarue aribövi jabesi varijore God-are soroho jajivëhego evare jemëro ë jajoho garomo uvo'irarijego: God-ro tugohë'e hōromo jemëro jabumë bogo ijumëvo'i öri ari'ohemu ijumo'irarije höjo. <sup>4</sup> Ëhi uvavamu hejë'i hejodeje aëro uevamu: God-are soru varijore baejare aho 144,000 ëmino'e höjo. Israel hesi agane 12 aho'obëhe baebe va'ë'e höjo. <sup>5</sup> Judah'o hesi ujoho 12,000. Reuben hesiroho 12,000. Gad hesiroho 12,000. <sup>6</sup> Asher hesiroho 12,000. Naphtali hesiroho 12,000. Manasseh hesiroho 12,000. <sup>7</sup> Simeon hesiroho 12,000. Levi hesiroho 12,000. Issachar hesiroho 12,000. <sup>8</sup> Zebulun hesiroho 12,000. Joseph hesiroho 12,000. Benjamin hesiroho 12,000. Ëaribövioho 144,000 jaburo God-are soroho baeruumade höjo.

*God-are aribövie ae aho'obëhe riravoruumade jöhoje.*

<sup>9</sup> Ëhi'amu naro ga'i gavodeje ae aho'obëhe mae riravamu. Bogo adaho varijënoho jiohijo. Sa'ae dinö'e dinö'e agane gö gö sine gö gö huë gö gö aribövioho ajivë'e niögu ëgoho io'amë'e juva hanoho ujuohë'e God-are röho ma hesi nuninö Sheep Harihu hesi nuninö riravohijo. <sup>10</sup> Riravoromo ma-darugo'o uvoruomohijo: God röho mare hiromo muebejavuajohu'o Sheep Harihohu'o jaburo niö'iro mabëhe ajamuiromo manö babamavuë'e höjo. <sup>11</sup> Ëhi uvoruomamu God-are röho maho riri mare jio'i God rajahjarue maje 4-ho ruë numë riravo rova'i röhu majo jabesi dejonö a duvahoho ruë numë raromo



rova'li röhu a duvaho jabesi dejonö ë aneraho aho'obëhe ruë numë riravo rova'ohijo. Ëhi riravoromo röho ma hesi riröre ague aho raromoromo God rajahiruomohijo. <sup>12</sup> Rajahiromo uvoruomohijo: Aveho iae mae-ëjo. Aji maho uehoro maho iho maho darugo maho vörö maho nosi Böröme God-aremu jiajoho ëhi ma-jiemu jiobe va'a'ajëjo. Ma-jiemu jiobe va'ië'ego noro hu gemu rajahiromo huë mabëhe uanövo'ejarëjo. Iae mae-ëjo.

<sup>13</sup> A duvaha 24-ho röhu gemuëro rilöromo na uehijo: Ëajivë'e niögu ëgo io'amë'e aribövioho rahumë jioruomajëjo. Dinö'e jioromo rueruomade höjo. <sup>14</sup> Rueruomade höjamu naro uavodeje: Na bogo gavajëjo. Jasi jero gavanuëjo. Jasi jero gavanuë'ego rue a duvahohuro uehijo: Ëajivë'e niögu io'amë'e aribövioho ëho bogo vuovëvë'e sa'are raromamu evare Iesu bijönimarue ariböviohuro jabesi örire huë vavaene börömo bëhe bojëmamu baeruomade höjo. Baeromo röhu iae mae rueruomade höjo. Jabumëro God-are Sheep Harihu hesi köhuro jabesi niögoho u'oruomamu jabesi sisëho barëjähë'ëro niögoho ma-ajemu jiëho'amajëjo. <sup>15</sup> Ëhu'ëro jië'ëro jabumë God-hu hijaje röho ma ë hesi nuninö riravoromo hesi osare vahie majae ma-hesi muohemu vaemu vaejahoruomaje höjo. Vaejaho'iramu röho mare hijaje ahuro jabu'o gemu mae hiromo mu sisëho raboho tugohëho'iramu munë bururo raromanovoruomo'ajëjo. <sup>16</sup> Munë bururo raromanovoruomo'iramu

ijonöho vadunoho bogo hömëvonövo'ajëjo. Huëho bogo girihëvonövo'ajëjo. Majaho bövioho bise'oho bogo ravëvo'iramu sinoroho vörö'iraeromo birebirëgonövo'ajëjo. <sup>17</sup> Rabëni hesi bëhoho God-are Sheep Harihe röho ma hesi ririre hijaje ahuro ë aribövioho hesi Sheep ömo'ömege gagovëvoromo muebejëvonövo'ajëjo. Muebejëvoromo sö ujuohoromo a i'ovëvo'iröhe jovore ë va'onövo'ajëjo. Ëhi'o'iramu God-ro jabesi nuni jovoho miorëho'iramu jabesi huë vavaenoho aho'obëhe barë'ajëjo.

## 8

*Suri badihi taemo'amare sivae 6 gohobe rovadoho ijo tugoho'i number 7-ho gohade jöhoje.*

<sup>1</sup> Ëhi'ego Sheep Harihehu urimo surire sivae övo gö mine övo göre gemu gohadoho röhu ijo tugoho'i number 7-ho gohohijo. Goho'ego evare ö'idöho jörumoraebe va'ojuvo half hour rabu'e barëjadeje. <sup>2</sup> Ëhi'amu evare anerae 7 God-are nuninö riravaruoho naro gëvodeje. Riravoromo hëgöe aho'obëhe 7 bojëmi'ego gemu gemu ujuohohijo.

<sup>3</sup> Ujuoho'ego anerae göëro gold'e hevöho baeromo ruehijo ose ë bamoromo vënëro buejego ridi'e vëni u'ohuro God-ni ajiomoröhego. Hevöho baeromo God-ni suvuro vënehu buejarue maratue gold-ehu avohare ë hesi bëhire rueromo ë namihijo. Nami'ego aëro ose aho'obëhe bojamihijo huro God-hu hijajire nuninörire maratuore ë bamoromo buejego God-are ariböviohuro ëninamijego

ëninamaruohu'o ridohu'o gemuoro havoromo God-arire ajiomoröhego. <sup>4</sup> Osoho bojami'ego anerahuro övëro ma'eno'ego God-are ariböviehu ëninamaruohu'o ridohu'o gemuoro havoromo God-arire ajiomohijo. <sup>5</sup> Ëhi'ego anerahuro ridi'e hevöho baeromo God-ni suvuoro vënehu buejarue maratu döre ravë'e vënoho aegoromo irijjomo'ego vënoho suovoromo io'amo'ego sa'are rireromo abuehijo. Rireromo abue'ego baderivoromo vajeri varuru'e vaeromo sa'aho hijiohijiovohijo.

*Aneraehu hëgö huobe rovere jöhoje.*

<sup>6</sup> Ëhi'ego rue anerae aho'obëhe 7-ho hëgöe gemu gemu ujuohë'ëro huoli jö'ore bamohijo.

<sup>7</sup> Jö'ore bamoromo anerae number 1-ohuro hëgöho huohijo. Hëgöho huo'ego ënëro direjohijë'e masijohu'o vëni'o kö'o buarohë'oho otehö'ö'ego ö'idöre jioromo sa'are rireromo abuehijo. Rireromo abue'ego sa'ae aho'o ije aho'o niö'i gemu tariojaroho gemu ö'idöre jioromo rireromo abuejade vënohuro ravo barëhijo. O garasi rude rövë'e ma-maho aho'obëhe ravo barëhijo.

<sup>8-9</sup> Ëhi'ego anerae gemuehu hëgö huadoho röhu number 2-ohuro hëgöho huohijo. Hëgöho huo'ego evare dahoru böröme vënehu ravanovë'ohuro ahoromo sö jovo e'ure abuehijo. Abue'ego sö jove aho'o jovo mie aho'o boat aho'o niö'i gemu tariojaroho jövëro dirö'e gemu köraehijo jovo mie ë dirö'e gemuore vuovohijo boat ë dirö'e gemuore dadorovo'amohijo. Röhu dirö'e niö'i bogo.

10 Ëhi'ego anerae niö'iehu hëgö huaroho röhu number 3-ohuro hëgöho huohijo. Hëgöho huo'ego jiji böröme ö'idöre jioromo vënëro ravanovë'e be'abuehijo. Be'abueromo rova'o'amë'e jove aho'obëhe sa'a gagore rojomo'amaje jove aho'obëhe niö'i gemu tariojaroho dirö'e gemu taemohijo. 11 Taemamu jovoho ajuovadeje jiji hesi ihoho Ajuo'ëro jië'ëro. Ajuovo'ego ae aho'obëhe ë jovoho ue'ahoromo ajuomo'amoromo vuovohijo. 12 Ëhi'ego anerae aho'obëhe niö'i gemuehu hëgö huaroho röhu number 4-huro hëgöho huohijo. Hëgöho huo'ego majae manaere jiji mujöru'e ha'ose aho'obëhe niö'i gemu tariojaroho gemu sisërëhijo. Sisërëromo ramoramovohijo. Ramoramovë'ëro ëhu'ëro majaehu sisonu'e jenile maja'e ajivo'iröhe majae bamo'iröhoho niö'i gemu tariojaroho gemu bogo ajivo'i ramoramovohijo. O manaerehu jiji mujöru'ehu vahi'e ajivo'iröhe majae niö'i gemu tariojaroho gemu bogo ajivo'i ramoramovohijo.

13 Ëhi'amu naro ga'irögoro ë'amu gavë'i evare hejodeje buruhohuro döre biojë'i uvavamu: O vaevë'e vaevë'ëjo. Sa'are raromaruje aribövioho anera ioro'ioroho niö'i gemu jaburo hëgöho huobe va'iramu jemë sisërëjëvo'ajëjo.

## 9

1 Ëhi'ego anerae ëhi niö'i ëhi niö'iehu hëgö huaroho röhu number 5-huro huohijo. Huamu gavode jijohe ö'idöre jioromo sa'are be'abuejë'e jiamu gagorovo gavodeje gua gago

ëgobövi ma ë hesi ojo jiovarue key-oho aëro jiji hesi örيره bojami'ego baejamu. <sup>2</sup> Gua hesi ojo jiovarue key-oho baenugoromo gago ëgobövi hesi ojoho jiovhijo. Jiovo'ego vëni bërömo bëröme gua gagore jioromo u'ivoromo rojomohijo. Rojomoromo majaho tugoho'ego öri ari'oho aho'obëhe ramoramovohijo. <sup>3</sup> Ramoramovo'ego guaeaviguaeviëro vëni u'ire jioromo sa'are ruvebiruomohijo. Ruvebiromo ë guaeaviguaeviohuro niani'ö hesi vörö va'ënoho baejareje ae ijumo'amoröhëni. <sup>4</sup> Vöröho baeromo röhu heruomadeje uëvavamu: Garasie ije ö'e iruno'e resu resue rabe rabe sa'are jiajoho bogave ijumo'irarijëjo. God-are soru varijore bogojië'ohemu ijumëvorëjo. <sup>5</sup> Ijumëvë'oho jabumë nadi muo'amëvo'irögoro niani'öehu umijego vi'ehëgaje ëhi jië'e vi'ehoho manaere övo gö mine bojëmibe va'orëjo. Èhi uëhijo. <sup>6</sup> Èhi uëvadëhi ë manaere övo gö mine hesi uhure ë ijumëvë'e aribövioho vuovo'i nëgo'ë'e. Vuovo'i nëgo'iramu vuovo'i öroho bogo biroho'ë'ö.

<sup>7</sup> Röhu ë guaeaviguaevi jabesi sino haho'oho muorovo'irögoro avohëhare horse-oho va'ëne jio'amohijo. O jabesi simanore gold'e bosö va'ënoho didi'ëho'amë'e jiohijo. O jabesi nu ano'oho a nosi nu ano'o va'ëne jio'amohijo. <sup>8</sup> O jabesi simano uoho magonahe simano rudu'e jabesi u jiajëhi ëhi jiohijo. O jabesi anoho vösö'e lion jabesi ano va'ëne jiohijo. <sup>9</sup> Röhu aehu muorovo'irögoro biriri'e niögehu vinebi tugohoromo io'amarue ëhi jië'e biriri'e niögoho vinebire io'amë'e jiohijo. O vivojehu dioho-

diohovoromo huosihë'oho ëho muorovo'li va'li horse-ehu maratu jagu ujuohoromo darugo'o va'ego garahörö'e baejego hejaruëhi ëhi jiavo-hijo. <sup>10</sup> Röhu jabumë uho'e jio'amohijo. Jabesi uhoho vörö'e niani'ö uho va'ëne jio'amohijo. Vöröho uhore jië'ëro ë uhohuro manaere övo gö mine umibe va'ë'ö. <sup>11</sup> Röhu ë guaeaviguaeavi jabesi börömo vaeromo muebejevaje aho gua gago ëgobövi muebejaje anera sisëhoje. Ëanera hesi ihoho Hebrew jöëro uvarueje: Abaddon-ajo. O Greece jöëro uvarueje: Apollyon-ajo. Ëiho hesi bëhoho bövi bise'o ijumo'amajohoje.

<sup>12</sup> Guaeaviguaeavi rueruomade vavaeni'e muoho iae barë'i röhu buruhehu uvade vavaeni'e muoho niö'i gö'o rue'ë'e.

<sup>13</sup> Iae anerae övo gö minehu hëgö huaroho röhu number 6-huro hëgöho huohijo. Hëgöho huamu hejodeje God-are nuninö namijaje gold'e maratu osore osore jioromo uvavamu.

<sup>14</sup> Uvoromo ë vejö'e hëgö huaje aneraho uavavohijo: Nume anerae ëhi niö'i ëhi niö'i Euphrates jovo börömore tövëvaroho jiovo nugö'ö'amëjo. <sup>15</sup> Jiovo nugö'ö'amëjamu rue hëgö huade anerahuro ë anerae ëhi niö'i ëhi niö'i tövëvaroho jiovo nugö'ö'amohijo ae aho'obëhe sa'are raromaruoho niö'i gemu tarioromo niö'i nugo'li gemu muo'amo'iröhego ë aneraho ëhi niö'i ëhi niö'i God-ro tövëvoromo bamëvë'ëro ë majaho ë manaeroho ë vadunoho rovego jiovo nugö'ö'amego ë sa'are aribövioho muo'amëvoröhego. <sup>16</sup> Röhu ë anerae 4 jabesi horse-re va'arue muorovo aribövioho iae 200 million jiadeje. Ëjöho iae na hejodeje. <sup>17</sup> Röhu

ë muorovo'iröhe horse jabesi o horse va'arue muorovo aribövi jabesi nu ano'o'oho nia'ovoro gavodeje. Jabesi vineboho biriri'e niöghuro tugohoromo io'amë'e jiohijo. Röhu biriri'e niögu jabesi nu ano'o'oho kavuë'e vëni hödu va'ëne rövë'e vëni u'i va'ëne o hövë'e munë ravoromo hödu hövë'e jiajëhi ëhi jio'amohijo. Röhu horse jabesi simanoho lion jabesi simano va'ëne jio'amohijo. Röhu vëni höde vëni u'e o hövë'e munë ravoromo hödu hövë'e jiajëhi jië'o'oho ëho jabesi jö'ore jioromo suorovohijo. <sup>18</sup> Horse jabesi jö'ore jioromo suorovoromo vëni hödoho o u'o'oho o hövë'e munë hövë'e jiajëhi jië'o'oho ë mu sisëhuro ae aho'obëhe sa'are raromaruoho niö'i gemu tariojaroho niö'i rëmo'i gemu ravëvo barëjadeje. <sup>19</sup> Röhu ë horse jabesi vöröho jabesi jö'ore o jabesi uhore jiohijo. Jabesi uhoho simano'e jiohijo ëhuro ae ijumo'amo'iröhëni. Jabesi uhoho simano'e jië'ëro ëhu'ëro ë uho jabesi nu ano'o'oho sigobu sisë jabesi nu ano'o va'ëne jiohijo.

<sup>20</sup> Ëmu sisëhuro ëhi rueromo ijumëvo'ego a ioro'ioroho vuovëvo'i ioro'ioroho bogo vuovëvohijo. Bogo vuovëvadeje röhu inömo sisë jabesi övehu avohoromo uehorovaruoho bogo uehorovoromo vuonugo'i a'i inömo sisë gold-ehu o silver-ehu o copper-ehu o munë göehu göehu o ijehu avoho'amaroho sarerivoromo uvoruomohijo: Ëho aru'aho'e höromo uehorovemu uehorovoruomohijo. Röhu ëhi jië'e inömoho bogo uheriharueje. Bogo hejarueje. Bogo jijiharueje. Mamomorö'öjarueje. Ëhi jië'e inömohu'o aru'aho

sisēhu'o uehorovaruoho bogo vuonugo'i ēhi ma-uehorovoromohijo. <sup>21</sup> Ēhi ma-uehorovoromo a muo'amarue muoho bogo vuonugoromo iro oso'e muoho bogo vuonugoromo öñö'e muoho bogo vuonugoromo vajiohu'e muoho bogo vuonugo'i ma-vaemu vaerumohijo.

## 10

*Aneraehu suri bise'o John bojamamu ijade jöhoje.*

<sup>1</sup> Ēhi'amu gavodeje anera göho hesi darugoho bövi maho jiē'ëro suëro numë'e simano döre nuoge ba'amë'e sa'are ruvebijamu. O hesi nu ano'ooho maja va'ëne ajivë'e jio'i hesi höroho vëni hödu ëgobövi va'ëne jiohijo. <sup>2</sup> Röhu huhoharue suri bise'oho jiovë'e ë anerahuro övëro ma'ënohijo. O hesi höru maho sö jovo döre bamo'i hesi höru adoho sa'a döre bamoromo ēhi namihijo. <sup>3</sup> Ēhi namiromolion-ehu uvaruēhi ēhi ma-vöröëremu uvohijo. Uvo'ego vajeroho aho'obëhe övo gö mine övo göre niö'i ano'amoromo dirö'e göre göre ēhi uvobe va'ohijo. <sup>4</sup> Vajeroho anoromo uvobe va'amu hejē'i ë vajerehu uvare jöho naro jajivo'irögoro ë'odeje. Jajivo'i ë'irögoro hejodeje jöe ö'idöre uevavamu: Vajere övo gö mine övo göre niö'i uvaroho nadi jajivo'i subivëhonëjo.

<sup>5</sup> Röhu höru gö sö jovore bamo'i höru gö sa'are bamë'e namijamu gavode anerahuro övo maho ö'idöre nugojiomohijo. <sup>6</sup> Nugojiomoromo God-are ihore darugo'e jöho majëhiromouvo'hijo: Ioro'iolemu hijaje aho God ö'idö sa'a



jovo bövi bise'lo avoho'amade ahuro ge'ego na ave jöho majëhi'irögoro ë'ajëjo. Ijonöho bogo muebel'irögoro <sup>7</sup> a'i anera göhuro hëgöho huo'iramu evare God-hu mami'e subivahuade mu jioröhe jö God-hu hesi mu vaeromo jö majëhijarue aribövi uëvadoho ë muoho iae jio barë'ajëjo.

<sup>8</sup> Ëhi uvamu röhu urimo ö'idöre uevavamu hejode ahuro jöe gö majehiromo uevavohijo: Rue anera hörü gö jovore bamo'i hörü gö sa'are bamo namiromo jiovë'e suri övehu ma'enajoho ë suroho jero va'oromo baejëjo. <sup>9</sup> Ëhi uevamu hegorovo naro va'oromo aneraho uavodeje: Suri bise'oho bojemijëjo. Suri bise'oho bojemijëjamu uevadeje: Më suroho baeromo ijëjo. Baeromo i'iramu jö'ore vuomëro rihuamanovo'i röhu dë vi'ehago'ajëjo. <sup>10</sup> Vi'ehago'ajëjamu naro baeromo ijamu vuomëro rihuemanovoromo hejodeje dë vi'ehëgavamu.

<sup>11</sup> Vi'ehëgamu aëro uevareje: Röhu maho ri'öromo sa'ae dinö'e dinö'e sine gö gö huë gö gö sa'are a masije gö gö ëho jabesi jö God-hu jövajoho jero majëhinego ae aho'obëhe he'irarëjo. Jasi muoho ëhi höjo.

## 11

*God-are jö majëhijare ae niö'i jabesi jöhoje.*

<sup>1</sup> Ëhi ue'ego aëro guduodo va'ëne vahu baejarue ijahe memiromo uevavohijo: Ri'ö va'oromo God-are javu börömo hesi vahuoho o God-ni mi suvoro buejarue maratu hesi vahuoho baeromo ganëjo dimino'e jiego. O

osare raromoromo God rajahijarue aribövioho adahoromo ganëjo dimino'e jiego. <sup>2</sup> Röhu God-are javu hesi vahu baej'oho rirönöho nadi baenëjo. Ëhesi bëhoho javu riröho Jew rajoho bogo a'i sa'a gö raje God-are jö bogo heruomaje aribövi jabesi örire bojëmijë'e höjo. Jabesi örire bojëmijë'ero jabumëro rueruomoromo God-are amo börömoho Jerusalem manaere 42 hesi uhure hörü duruajo'ëro vaeruomo'ajëjo. <sup>3</sup> Hörü duruajo'ëro vae'i ë'iramu evare nasi jö majëhijarue ae niö'i naro uë'iramu jabumëro niögu sisëho io'amoromo nasi jöho majëhibe va'iröhoho ë manaere 42-ho barë'ajëjo. Ëhi uevavohijo.

<sup>4</sup> Ëae niö'ioho ëho sa'a muebejaje a God-are nunire rirarovarue olive ije niö'ioho va'ëne o hesi nunire rirarovarue iro niö'ioho va'ëne jëve. Ëhesi bëhoho ë olive ijo niö'i jabesi jovo baeromo buejego ajivajëhi o ë ire niö'i buejëvego ajivajëhi ë ae niö'iohuro ëhi God-are darugoho baeromo ajoho barue'ë'ö. <sup>5</sup> Röhu aehu ë ae niö'i jabesi örire ijumëvo'ië'iroho vënëro ë ae niö'i jabesi jö'ore jioromo rueromo nu huodëgarue aribövioho ravëvo barë'ë'e. Ae rahu jabumë ijumëvo'ië'ioho iae ëhi vuovëvo'ë'e. <sup>6</sup> Röhu ë ae niö'ioho jaburo vöröho bae'ë'ö ëhuro God-are jö majëhijarue majaho rovego evare ënoho tugohego bogo ruejuvo jöho majëhi barëjego evare rueröhego. O vöröho bae'ë'ö ëhuro jabesi divare nëgë'iroho jove gö gö ijumo'amego kö'irae'amoröhego o uvego sa'are aribövioho guomo guomo sisë gö gö bae'amoröhego.

7 Amo jabesi jöho majëhibe va'ojuvo barë'iramu vörö'e majo sisëhuro gua ëgobövire jioromo rojomoromo ae niö'iohu'o muorovo'ë'e. Jabu'o muorovoromo ruahö'öjëvoromo anëgo'iramu vuovëvo'ë'e. 8 Vuovëvo'iramu jabesi sinoho amo börömo hesi öri börömore ëhi raromëvo'ë'e. Ëamoho sisëgo ëhuni uvarueje: Ëamoho Sodom o Egypt höjo. Röhu urimë'i ë ae niö'i jabesi A Börömo aëro gudumoromo ë ame gemuore korosire anareje. Amo ë ame gemuore jabesi sinoho raromëvo'ë'e. 9 Raromëvo'iramu sine gö gö agane gö gö huë gö gö sa'ae dinö'e dinö'e aribövioho ëho jaburo rueromo ë ae niö'i jabesi sinoho ërimëhoromo uarvonövo'ë'ö: Bogo guavëvo'ëjarëjo. 10 Ëhi uarovoromo sa'are rarumarue ariböviohuro uvoruomö'ë'e: Ëae niö'iohuro huë vavaene aho'obëhe nosi örire bojamuinövare höjo. Röhu vejö'oho vuovëvë'e höromo nimoronimorohoromo suvuoramirovo'ë'ö. Ëhi'ojuvo majae niö'i gemu röhu ma-bisemu hesi ijore barë'ë'e. 11 Ëmajaho barë'iramu God-ro jö'o ögëro jabesi nu gagore huosihëho'iramu vuovëvadoho i'ovoromo ri'öromo döro rirarovo'ë'ö. Döro rirarovo'iramu ae aho'obëhe jabumë gëromo juhuonivo avohö'ë'ö. 12 Juhuonivo'iramu ë ae niö'iohuro he'ë'ö ö'idöre jöe uvo'iramu: Avehuro rojomohëjo. Avehuro rojomohë'iramu evare jabumë nu huodëgarue ariböviohuro ga'ë'ö ë ae niö'ioho ö'idöre suëro numëvobe ajiomö'iramu. 13 Ö'idöre ajiomö'iramu evare

sa'aho hijiohijiovo'ë'e. Sa'aho hijiohijiovo'iramu amo taritarivaroho dirö'e 10 jië'ëro dirö'e 9 mae jio'i dirö'e gemu ijumo barë'ë'e. Dirö'e gemu barë'iramu ae aho'obëhe 7,000 vuovëvo'ë'e. Vuovëvo'iramu a ioro'iorohuro juhuonivoromo uvo'ë'ö: Asë'e ö'idöre hijaje ae God hesi ihoho böröme höjo. Ëhi jioröhoho naro nia'ovoro gavodeje.

<sup>14</sup> Vavaeni'e mue niö'i buruhehu uvadoho iae barë'i röhu number 3-oho ma-burëro ruel'ë'e.

*Aneraehu hëgöe 6 huobe rovaroho ijo tugoho'i number 7-ehu huade jöhoje.*

<sup>15</sup> Iae anerae övo gö mine övo göre gemuehu hëgö huaroho röhu ijo tugoholi anerae number 7-huro hëgöho huohijo. Hëgöho huo'ego ö'idöre darugo'o uvoromo uvoruomavohijo: Jaruvoho nosi Bada God'o God-hu uavë'ëro böröme namiromo ajamuijaje aho Keriso'o jabu niö'iro darugoho baejë'e höjo bövie rirarovoromo sa'ae aho'obëhe muebe'amoröhëni. Darugoho baejë'ëro God-ro böröme namiromo muebemu muebebe va'onövo'ajëjo. <sup>16</sup> Ëhi uvavamu hegorovo a duvahe aho'obëhe 24 a masijehu raromarue röho mare God-are bëhire raromaruohuro ri'öromomo ague aho raromoromo God rajahiruomohijo.

<sup>17</sup> Rajahiruomomo uvoruomavohijo:

O asë'e Bada God daruge aho'o baejë'e ae javajëjo.

Urimë'i jiobe rovanoho jaruvohu'o ëhi gemuoho hiemu hijanue ae javajëjo.

Jasi darugo börömoho baeromo dö mare hiromo  
aevoromo aho'obëhe muebejavuë'ego  
ëhuni rajahijaruëjo.

<sup>18</sup> Urimoho sa'ae dinö'e dinö'e raromarue  
ariböviohuro vörö'iraejë'e raromonövare  
höjo.

Jaruvoho jero jabesi örire vörö'iraejanuëjo.  
Majaho rovë'e höjo vuovëvë'e aribövi  
mevëvoromo gë'iranoho mae o sisë jëvego.  
Gëromo jasi mu vaejahoromo jö baeromo  
majëhijarue aribövi jabesi mana  
bojëmi'iranoho

jasi aribövi ma jabesi mana bojëmi'iranoho  
jasi iho mae uehorovarue aribövioho ininore va'lo  
masijore jabesi mana bojëmi'irane ë hesi  
majahu'lo

sa'are bövi bise'lo ijumaruoho mana  
ijumëvo'irane ë hesi majahu'lo rovë'e höjo.

<sup>19</sup> Ëhi uvo'ego God-are osae ö'idöre jiajoho  
jiovohijo. Jiovo'ego God-are jögoru jiaje maua  
va'orahoro jiohijo. Va'orahoro jio'ego baderiv-  
oromo vajeri varuru'e vaeromo sa'aho hijiohi-  
jiovoromo ënëro direjohijë'e masije darugo'lo ru-  
vebihijo.

## 12

### *Sigobu börömehu magonaho sihade jöhoje.*

<sup>1</sup> Ëhi'amu gavodeje bogo gavaruëhi jië'e mu  
böröme gö ö'idöre jiamu. Ëmu hesi bëhoho  
magonahe gemu jiohijo. Majae niögu va'ëne  
ba'amë'e jiohijo. O höroho manaerore bamë'e

jiohijo. O hesi simanore jije aho'obêhe 12 inovoromo bosö va'êne didi'ahê'e jiohijo. <sup>2</sup> Röhu hu dë'ëro jië'ëro raho'irögoro vi'ehe böröme baeromo hara'uoromo darugo'o jö'e dadovavohijo.

<sup>3</sup> Èhi'ego bogo gavarue mu böröme gö'o ö'idöre ruehijo. Èmu hesi bëhoho kavuë'e sigobu börömo böröme jiohijo. Vörö'e mae jiohijo. Hesi simanoho aho'o övo gö mine övo göre niö'i jio'amohijo. O hesi danoho aho'obêhe övo gö mine övo gö mine jio'amohijo. O sigobu simanoho gemu gemu a masijehu io'amaruëhi jië'e bosöhuro didi'o'amë'e jio'amohijo. <sup>4</sup> Röhu jije aho'obêhe ö'idöre jio'amajoho niö'i gemu tariojaroho dirö'e gönö niö'i nugo'i dirö'e gönö gemu sigobu hesi uhohuro sa'are ujuoho io'amohijo. Ujuoho io'amoromo ë harihu raho'ië'aje magonaho hesi nuninö raromoromo muebehijo rahego harihoho i'iro. <sup>5</sup> Raromoromo muebe'ego rue magonahohuro harihoho rahohijo huro ijonö hujejo ha'itoho baeromo sa'ae dinö'e dinö'e raromarue aribövioho vörö'o muebejëvego jaburo hu gemu ejahoröhego. Amo harihoho raho'ego ë aho ma-majioho ba'ojio God-hu röho mare hijajire ë nugohijo. <sup>6</sup> Evare vëmohuro ju'ebiro mo arue a rumo'e sa'are va'ohijo God-hu avohahade öri ari'ere ë hijego God-ro ajamiromo muebebe va'ego majae aho'o 1260 barë'iröhego.

<sup>7</sup> Èhi'ego ö'idöre muorovohijo. Anera böröme Michael'o huhu muebejëvaje anerahu'o ëho jaburo ri'öromo sigobohu'o muorovoruumohijo.

Muorovo'ego sigobohu'o sigobu hesi anera ömo'ömo'hu'o mana muorovëmihijo. <sup>8</sup> Muorovëmi'ego rueho jaburo sigobohu'o hesi ariböviohu'o taemëvohijo. Taemëvoromo uëhijo: Ave ö'idöho ioro'io'oremu vuonugo'i va'ohëjo. <sup>9</sup> Èhi uënugoromo ë sigobu böröme ö'idöre jiajoho baba'amohijo. Èsigoboho ni'i'ivadire jiobe rovadoho hesi ihoho Devil o Satan jiohijo. Sa'ae dinö'e dinö'e raromarue aribövi sareramui'be juvaje ahoje. Hu'o hesi anera sisë ömo'ömo'hu'o sa'are baba'amëvohijo.

<sup>10</sup> Baba'amëvamu hejodeje ö'idöre darugo'o uvavamu: Jaruvoho nosi Börömo'ho God-ro hesi darugoho röjahui'romo bövi mae nami'romo sisëho noni ruahö'öjahuë'e höjo. O jaruvoho God-hu uavë'ëro böröme nami'romo ajamu'aje aho Kerisoro no muebejavu'aje darugoho röjahuijë'e höjo. Èhesi bëhoho jö sisë majahijaje aho baba'amë'e höjo. Huro God nosi A Börömo hesi nunire nami'romo vae majae nosi ö mueno'o jabesi jö sisëho sareramio'romo majahinövade höjo. Röhu jaruvoho baba'amë'e höjo. <sup>11</sup> Nosi Christian ö mueno'ohuro uvare höjo: God-are Sheep Harihoho köe rueromo guomë'ëro mae javuajë uvoromo hesi jöho ae sama'e majëhi'romo ëhuro sisëho ruahö'öruomade höjo. Jabesi sinoho bogo uehorovo'i uvare höjo: No Keriso-are jöëni vuovë'oho iae hesi höjo. <sup>12</sup> Èhuni ö'idöho mabëhe höjo. Ö'idöre jiaruje aribövioho mabëhe jëvaje ni-morohohëjo. A'i sa'ahu'o jovohu'o vaevë'e höjo ë hesi bëhoho Satan hu ë abuejë'ëgo. Abuejë'ëro garomo uvaje höjo: Nasi majaho barë'irögoro

ë'ajëromo vörö'iraejë'e höjo. Ëhi uvoruomohijo.

<sup>13</sup> Ëhi'ego rue sigobohuro gavade baba'amë'ëro sa'are jiamu gagorovo aharihu rahade magonahoho ijumo'i siho baeromo va'ohijo.

<sup>14</sup> Siho baeromo va'ego buruhi börömo hesi vivojoho niö'i magonahohuro God-aro baehijo ëhuro bioromo a rumo'e sa'are va'oromo hesi röhore hiröhëni. Hijego God-ro muebejego sigoboho ë magonahehu hijaje öri ari'eroho bogo va'ego vadune aho'obëhe niö'i gemu röhu

ma-bisemu hesi ijore barërohego. <sup>15</sup> Ëhi'ego sigobohuro jovo böröme hesi jö'ore oteh'öhijo ë jovohuro ruomoromo ë magonahehu jiajire va'oromo ë magonahoho bava'ojöro. <sup>16</sup> Jovoho oteh'ö'ego jovohuro magonahoho bae'i rue'ego sa'ahuro magonahoho ajamiromo tögöromo'ego jovohuro ë gagore va'o barëhijo. <sup>17</sup> Va'o barë'ego ë sigobohuro magonaho hesi örire vörö'iraeromo va'oromo magonaho hesi aboji harihu'o ioro'iorohu'o muorovo'i va'ohijo.

Röhu ë aboji harihu'o jabesi bëhoho God-are jögoru ejahoromo Iesuarë jö biririvoromo mae uehorovarue aribövioho jioruome. Ëariböviohu'o sigobohuro muorovo'i va'ohijo. <sup>18</sup> Ëhi'oromo ë sigobohuro va'oromo sö jovo riröre raromohijo.

## 13

*Vörö'e mi niö'iehu rueromo mu sisë vaejare jöhoje.*

<sup>1</sup> Sigobohuro sö jovo riröre raromamu naro gavodeje vörö'e mi sisë sö jovore jioromo rojomamu. Hesi simanoho aho'obëhe övo gö mine



övo göre niö'li jiohijo. O hesi danoho aho'obêhe övo gö mine övo gö mine jiohijo. O a masijehu didi'aruëhi jië'e bosöho dane gemu gemu jio'amobe va'ohijo. O simane gemu gemu God agarue iho sisëho gemuohemu jajivo'amë'e jiohijo. <sup>2</sup> Röhu ë vörö'e mi sisë hesi nu ano'oho leopard nu ano'o va'ëne jiohijo. O hesi höroho bear höru va'ëne jiohijo. Hesi jö'oho lion jö'o va'ëne jiohijo. Röhu rue sigobohuro darugo börömëro jië'ëro ë darugoho vörö'e mi sisëho bojamiromo uahijo: Na'lo rörömo röho maro ajio hiromo nasi öri ari'oho aho'o muebeje-honëjo. <sup>3</sup> Röhu ë mi sisëho hesi simanoho gemu aëro anamu guomoromo i'ovë'ëro batato'e jiohijo. Guomoromo i'ovë'ëro batato'e jiamu ae aho'obêhe ëho garomo tiötiövoromo simane sisë'i uehorovoromo uvareje: Ëho mae höromo hesi ijore ijore jijihoruomohijo. <sup>4</sup> Hesi ijore ijore jijihoromo uvoruomohijo: Sigobohuro vörö'e mioho hesi darugoho mabêhe bojamijade höromo ëhuni sigoboho rajahiruomohijo. Sigoboho rajahiromo vörö'e miohu'o rajahiruomohijo. Rajahiromo uvoruomohijo: Ëvörö'e mioho darugo ma'e höjo. Rahuarö ëhi jië'e darugoho höjo. Rahuro ë vörö miohu'o muorovo'ajëjo. Ëhi uvoruomohijo.

<sup>5</sup> Ëhi'ego God-ro ë vörö'e mi hesi öroho bogo tugohahohijo huro nimoronimorohë'i jö sisë jövoromo hesi nimoromo bövie bise'e muebebe va'ojuvo manaere aho'obêhe 42 barë'iröhego. <sup>6</sup> Öroho bogo tugohahë'ëro vörö'e mi sisëhuro ri'öromo God agoromo hesi

ihoho ijumoromo God-hu hijaje öri ari'oho sivoromo God'o gemu mae ö'idöre raromarue aribövi jabesi sisëho sarerivoromo ëma jövohijo. <sup>7</sup> Jö sisëho ëhi jövo'ego God-ro ë vörö'e mi hesi öroho bogo tugohahohijo huro God-are ariböviohu'o muorovoromo ruahö'öjëvo'iröhego. Ruahö'öjëvoromo vöröho baeromo agane gö gö sa'ae dinö'e dinö'e huë gö gö sine gö gö aho'obëhe muebejëvo'iröhego. <sup>8</sup> Ae aho'o sa'ae dinö'e dinö'e raromaruoho jaburo ë vörö'e mi sisëho iae uvene aho röjahiruomö'ë'e. Uvene aho röjahi'iröhe hesi bëhoho urimo God-hu ö'idö sa'a bogo bamadevare evare God-ro a ioro'ioro jabesi ihoho hesi Sheep Harihu anego guomoröhe hesi surire jajivo'amadeje hu'o maro raromemu raromö'iröhego. A ioro'ioro jabesi ihoho suriroho bogo jajivo'amadeje bogo ëhioho maroho raromö'iröhego. Röhu iho bogo jajivo'amë'e sa'are raromarue ariböviohuro vörö'e mi sisëho rajahiruomö'ë'e.

<sup>9</sup> God-are jö hejaruje aribövioho ave jöho hehëjo. <sup>10</sup> Aehu jemë guduamëvoromo savoji gagore ba'amëvo'ië'oho iae savoji gagoro ba'amëvo'ë'ö. O aehu muo'amëvamu vuovëvo'ië'oho iae vuovëvo'ë'e. Ehi jië'e mu sisë rue'iröhohuni ehuni God-are aribövioho jemëro birivoromo God gemu uehorovobe va'ore.

<sup>11</sup> Ehi'amu gavodeje vörö'e mi sisë gö'o sa'a gagore jioromo rojomamu. Emi hesi danoho niö'i sheep harihu hesi dano jiajëhi ëhi jövohijo. A'i huhu jö jövajoho ë sigobu börömehu jövajëhi ëhi ma-darugo'o jövohijo. <sup>12</sup> Ijore rovade vörö'e

mi sisëhuro urimore rovade mi sisë hesi vöröe gemuoho bae barëromo huni rōromo muoho vaehijo. Urimore rovade mi hesi muoho vaeromo sa'are raromarue aribövioho uëhijo jabumëro urimore rovade mi sisëho uvene aho rōjahi'iröhego. Aehu hesi simanoho gemu anahamu guomoromo i'ovade ë hesi batato'e simano jië'e mioho rajahi'iröhego muoho vaehijo. <sup>13</sup> Ijore rovade miohuro urimore rovade mi hesi muoho vaeromo no bogo gavarue vörö'e mu masijoho vaehijo. Mu masije gö gö vaeromo rōhu ae aho'obëhe jabesi nunire namiromo uvo'ego vënohuro ö'idöre jioromo sa'are ruvebihijo. Èhu'o ë'ohijo. <sup>14</sup> God-ro hesi öroho bogo tugohahë'ëro ëhu'ëro ijore rovade miohuro urimore rovade miohuni rōromo ëhi jië'e vörö'e muoho vaeromo ëhuro sa'are raromarue aribövioho sarerëmihijo. Sarerëmiromo uëhijo jabumëro urimore rovade mioho rajahi'i munë o rabe sehoromo inöme hesi nu ano'o va'ëne avohoröhego. Hesi simanoho gemu anahamu guomoromo i'ovade ë hesi batato'e jië'e mi hesi nu ano'o va'ëne avohoröhego. <sup>15</sup> Urimore rovade mi hesi nu ano'o va'ëne inömoho avoho'ego God-ro öroho bogo tugohahë'ëro ëhu'ëro ijore rovade miohuro ë mi nu ano'o va'ëne inömo hesi nu gagore jö'o ögëro huosihohijo mi nu ano'o va'ënohuro daruge baeromo jöe jövoromo garöhe ae rahu hesi öriroho bogo uvene aho rōjahijego muo'amo'iröhego. <sup>16</sup> Èhi'oromo ë ijore rovade miohuro a masijoho a ininoho inömo marohë'e aribövioho inömo rumo'e aribövioho a jabesi muemu vaejarue aribövioho jabesi nimoro

mu vaejarue aribövioho ae aho'obêhe mae jöe bojëmiromo uëhijo: Ë'ego no jemesi övo manö o varijore jajivëharëjo. Jajivëharëjamu ejëho'ego jajivëhohijo. <sup>17</sup> Bogo ejëho'ibejo mi sisëhuro öroho tugohëhego iruno'oho bövioho bise'oho bogo imo'ibejo. Ëjajivëharoho mi hesi iheje.

<sup>18</sup> Ëhesi bëhoho avoho uehorovore. Ae rahu simano ma'e jëvë'oho ë mi hesi iho hesi bëhoho nahoromo birohore. Hesi ihoho 666-je. Ëihoho avoho adahë'oho a ihe biroho'anue.

## 14

*God-are aribövie 144,000 jabuhu jö i'o ioruo-made jöhoje.*

<sup>1</sup> Röhu naro ga'i gavodeje God-are Sheep Harihoho Zion dahorure nami'ego ae aho'obêhe 144,000 Sheep Harihu hesi ihohu'o hesi Vavu hesi ihohu'o varijore jajivo'amë'e hu'o riravamu.

<sup>2</sup> Röhu hejodeje ruhe ö'idöre uvavamu. Jovehu ruomoromo uvego hejaruëhi o vajerehu anego hejaruëhi o aehu gita bejego heromo vuëvavuajëhi jöho ëhi jiavavamu. <sup>3</sup> Ëhi uvoromo God-hu hijaje röho ma hesi nuninö hu rajahjarue maje 4 jabesi nuninö a duvaho jabesi nuninö riravoromo jabesinö nu ano'oho nugoromo jö i'oho ioruomohijo. Ae aho'obêhe sa'are sisë'i raromaruoho röhu ae 144,000 ëmino'e God-hu baejëvadoho ë ariböviohuremu ë jö i'o io'iröhoho eni jëvadeje. A ioro'ioroho bogo.

<sup>4</sup> Ëaribövioho magonaho'oho mu sisëho bogo vae'i ma-mae raromarueje. God-are Sheep Harihehu dinö'e dinö'e va'ë'iroho jabu'o hesi ijore ijore

jijiharueje. A ioro'iore aho'obëhe jio'amajoho röhu God-ro i'u'e muoho baeromo ëhuro ë ariböviohuremu hesi baejövadeje. Ëaribövioho God'o hesi Sheep Harihohu'o jabuhu aevo'i mamabëhe baejëvaroho jëve. <sup>5</sup> Jabumë bogo sareri jöho atamu aho he'irögoro jabumë ma-maemu jëve.

*Anerae niö'i gemu jabuhu uvare jöhoje.*

<sup>6</sup> Ëhi'amu gavodeje anerae gö döre bioromo va'amu. Ëanerahuro God-are jö maho baejë'ëro sa'are raromarue aribövioho majëhiromo uë'irögoro ë'ohijo: Ioro'ioremu jioröhe muoho ëhi ëhi höjo. Ëjö maho sa'are raromarue aribövie aho'obëhe sine gö gö agane gö gö huë gö gö sa'ae dinö'e dinö'e raromaruoho majëhi'i va'ohijo. <sup>7</sup> Va'oromo jöho ma-darugo'o majëhiromo uëhijo: Jöe hehëjo. God-are öroro avo'avoho uehorovoromo uvohëjo: Hu gemu börömoho höjo. Huhu ae aho'o mevëvo'iröhe majaho rovë'e höjo. Ëhuni ö'idö sa'a sö jovo sa'a gagore suorovaje jovo bamade aho God hesi öroro uvene aho röjahihëjo.

<sup>8</sup> Ëhi uvo'ego anerae number 2-ohuro ijore rueromo uëvavohijo: Jöe hehëjo. Iae amoho bejë'e höjo. Iho'e amo böröme Babylon vejö'oho barëjë'e höjo. Ëhesi bëhoho urimë'i Babylon amo rajohuro mu sisë röjëhinövareje. Magonahehu ae mu sisë röjëhiromo vörö'e jovo i'imëmego ue'ahoromo simano sisërëromo önö'e jijiharuëhi ëhi Babylon amo rajohuro sa'ae dinö'e dinö'e raromarue aribövioho mu sisëho röjëhijamu

simane sisërëromo mu sisë sisë vaeruomë'e höjo. Èhu'ëro Babylon rajohuro God-are i'uoho baeruomë'e höjo.

<sup>9</sup> Èhi uvo'ego anerae niö'i rueromo jö majëhijaroho röhu number 3-ohuro jabesi ijore rueromo uëhijo: Jöe hehëjo. Ae rahu mi sisë o hesi nu ano'o va'ëne avoharoho uvene aho röjëhiromo hesi iho varijore o övore baejë'oho <sup>10</sup> ë ariböviohuro God-are i'uoho baeruomo'ajëjo. Aehu vörö'e jovo bogo sanuovë'e ma-ue'ahoromo hara'uarue ëhi jië'e i'uoho God-ro vörö'iraeromo bojëmi'iramu baeruomo'ajëjo. Baeromo God-are anera jabesi nunire God-are Sheep Harihu hesi nunire raromoromo vënohu'o vënehu ravoromo giosijiomë'e munëhu'o ravëvo'iramu hara'uoruomo'ajëjo. <sup>11</sup> Hara'uo'iramu ë aribövi ravëvaje vënoho bogo duoroho'i ma-u'ivemu u'ivonövo'ajëjo. U'ivo'iramu ae rahu mi sisë o mi hesi nu ano'o va'ëne avoharoho uvene aho röjëhijë'oho o mi hesi iho sinore baejë'oho ëhi jië'e aribövioho jabesi vi'ehoho bogo u'uho'i vae majae ma-jiemu jiobe va'a'ajëjo. Anerahuro ëhi uvavohijo.

<sup>12</sup> Èhi jië'e huë vavaeni rue'iröhohuni ëhuni God-are ariböviehu hesi jögoru ejahoromo Iesu gemu uehorovarujoho jemëro biririvoromo ëhi gemu vaebe va'orëjo.

<sup>13</sup> Èhi'amu hejodeje ö'idöre uevavamu: Jajivo-romo uvonëjo: Badare muohuni avevejö'e o ijonö vuovëvë'oho jabumë huë mae baebe va'a'aruëjo. God-are Aru'ahohuro jöe gemuoho jövoromo uvajëjo: Io'ajo. Iae huë mae baeromo mu masi-

jehu u'uvëvadoho vuonugo'i nuho'aruëjo. Nuhë'i ga'a'aruëjo jabuhu vaejarëhi ëhi mae jio'iramu.

*Anerae göehu aribövi ma gagovoromo avoho bahi'i anerae göehu sisë aribövi gagovoromo i'u bojëmade uhu jöhoje.*

<sup>14</sup> Röhu naro ga'i gavodeje a ma va'ëne aho ajivë'e sue döre hijamu. A masijehu didi'aruëhi jië'e gold'e bosöho simanore didi'ë'e jiohijo. O anio ma'e siravaho övore jiohijo. <sup>15</sup> Röhu anera göhuro God-are osa börömore jioromo höröromo ruehijo. Rueromo suere hijaje a hesi örire ma-darugo'o uahijo: Iruno'o gemuore bahjarue majaho rovë'e höjo. Jasi siravahuro tarivoromo avoho bahijëjo. Sa'are jiaje iruno'oho mami'e mavoromo eni jië'e höjo. <sup>16</sup> Ëhi uvavamu hegorovo sue döre hijaje ahuro ë siravahuro sa'are jiaje iruno'o maho tarivoromo avoho bahihijo.

<sup>17</sup> Ëhi'ego röhu anera göhuro God-are osa böröme ö'idöre ë jioromo anio ma'e siravaho baejë'e höröromo ruehijo.

<sup>18</sup> Ëhi'ego anerae gö vëni muebejaje anerahuro God-ni suvoro vënehu buejharue maratu bëhire jioromo ruehijo. Rueromo anio ma'e sirava ma'enaje anera hesi örire ma-darugo'o uahijo: Sa'are jiaje grape ö'i bajoho mavë'e jiaje jasi siravahuro tarivoromo ujuohëjo. <sup>19</sup> Ëhi uvo'ego rue anerahuro hesi siravahuro sa'are jiaje ö'i bajoho tarivoromo munë guorötore ujuoho bahihijo sa'ijosa'ijovoröhëni. Sa'ijosa'ijovo'iröhe hesi bëhoho God-hu

vörö'iraeromo a i'u bojëmi'iröhohoje. <sup>20</sup> Munë guorötore ujuoho bahijaroho bogo amo börömoroho jio'i hesi rori'o jiohijo. Röhu ë ö'i bajoho sa'ijosal'ijovohijo. Sa'ijovo'ego ëhuro ë kavuë'e ijo bajo jovohuro kö va'ëne sa'are oterohoromo e'u va'ëne ruhibe rojomojuvo a buno gëvaruëhi ë jovo hesi ëgoho ëmino'e jiohijo. O hesi börömoho 300 kilometre jiohijo.

## 15

*Ijo tugoho'i majare God-are i'u sa'a rajo bojëmi'iröhëro anerae 7 jabuhu rama ujuohare jöhoje.*

<sup>1</sup> Ëhi'amu gavodeje noehu bogo gavaruëhi jië'e mu börömo böröme ö'idöre jiamu. Ja'o ga'ibejane tiö'ibejane. Ëhesi bëhoho anerae aho'obëhe 7 jaburo a bövi bise'o ijumo'amo'iröhe inömo sisëho ujuoho ruehijo. Ëinömo sisëho ruel'iramu ëhuro God dë vörönimobe rovadoho barë'ë'e. Ëhuni ë inömo sisëho ijo tugoho'i a bövi bise'o ijumo'amo'iröhe inömoho jiohijo.

<sup>2</sup> Ëhi jio'i röhu gavodeje jovo e'u deri va'ëne börömo böröme jiamu. Ëe'u va'ënire vënëro ravanovoromo kavuohijo. O ë e'u va'ëne hesi riröre ae riravohijo. Urimoho ë ariböviohuro biririvoromo mi sisëhu'o hesi nu ano'o va'ëne inömohu'o ëho jabesi muoho jöho bogo ejëhoromo mi sisë hesi ihoho sinoroho bogo bae'i ruahö'öjareje. Ëariböviohuro God-hu i'imëmade gitaho ujuohë'e e'u va'ëne ë hesi riröre riravohijo. <sup>3</sup> Gitaho ujuohë'e riravoromo God-are mu vaejahaje ae



Moses-are jöho ioromo God-are Sheep Harihu hesi jöhu'o ioromo uvoruomohijo:

Bada God ja daruge aho'o baejë'e ae javajëjo.

Jasi muoho masije ma-mabëhe höjo.

Ja böröme namiromo sa'ae aho'o muebejavuanue ae javajëjo.

Jasi muoho bogo sareri'ehu jio'i ma-maemu jio'amajëjo.

<sup>4</sup> Bada raro ja bogo böröme hö uehorovo'ajëjo.

Raro jasi ihoho bogo döroho bamo'ajëjo.

Ja gemu ma-maemu javajëjo.

Sa'ae aho'obëhe rueromo jasi örire rajahiruomo'ajëjo

jasi mu ma va'orahoro jio'amajohuni.

<sup>5</sup> Èhi'amu gavodeje ö'idöre God-hu jiajire niögu javu maho jiovë'e jiamu. <sup>6</sup> Jiovë'e jiamu gagorovo naehu avevejö'e uëvode aneraho <sup>7</sup> è osare jië'ëro ma-mabëhe ajivë'e sanu'e niögoho io'amë'e vinebire gold-ëro muoho taemo'amë'e suorovoromo ruehijo. <sup>7</sup> Rue'ego God rajahjarue maje 4-ho röhu gemuëro anerae <sup>7</sup> jabesi örire gold'e hevöho <sup>7</sup> èhi anerae gemu gemu bojëmibe va'ohijo. Èhevö gagoho God-hu a i'u bojëmi'iröhe vöröhuro irijiomom'amë'e jiohijo God ioro'ioremu hijaje a hesi vöröhuro. <sup>8</sup> Röhu God-are ajohu'o darugohu'o è hesi u'ohuro God-are osa mare u'ivoromo rumorovohijo. Ae gö è God-are osa maroho bogo rumo va'o varijënoho jiohijo. Hujeji anerae <sup>7</sup>-ho jaburo a bövi bise'o ijumom'amo'iröhe mue <sup>7</sup>-ho vae barë'iramu evare va'oruomom'ë'e.

# 16

*Anerae 7-ehu God-are vöröe ramare jio'amajoho otehö'öjamu sa'are raromarue ariböviehu huë vavaeni sisë baebe rovamu John-hu gavade jöhoje.*

<sup>1</sup> Ëhi'amu hejodeje God-are osa mare anerae aho'o 7 jabesi örire ma-darugo'o uëvavamu: Va'oromo God-are vöröe ramae 7-re jiajoho sa'aro otehö'öhëjo.

<sup>2</sup> Ëhi uvo'ego anerae 1-ohuro va'oromo hesi övore ramare vöröho sa'are otehö'öhijo. Otehö'ö'ego mi sisë hesi iho sinore jajivëhoromo mi sisë hesi nu ano'o va'ëne inömo rajaharue aribövioho vi'ehi'e sagoho sagoho sisëho baeruomohijo.

<sup>3</sup> Sagoho sagohoho baeruomamu urimo anerae gemuehu ramare vörö otehö'öjadoho röhu number 2-ohuro ramare vöröho sö jovore otehö'öhijo. Otehö'ö'ego sö jovoho vuovë'e a jabesi kö va'ëne jio'amohijo. Jovoho kö va'ëne jio'ego jovore jijiharue majoho aho'o vuovo barëhijo.

<sup>4</sup> Vuovo'ego urimo anerae niö'iehu vörö otehö'öjaroho röhu number 3-ohuro ramare vöröho otehö'öhijo. Otehö'ö'ego rova'o'amë'e jovohu'o sa'a gagore rojomaje jovohu'o körae'amohijo. <sup>5</sup> Ëhi'amu naro hejodeje jovo muebejaje anerahuro uavavamu: O asë'e God urimë'i jiobe rovanoho avevejö'oho ëhi javajëjo. Ja a maemu javajëjo. Jaehu a gëromo ëhi jië'te i'u mana bojëmijanuoho iae mae höjo. <sup>6</sup> Nume aribövi sisëhuro jasi jö baeromo majëhijarue ariböviohu'o jasi aribövi ma ioro'iorohu'o

muo'amamu jabesi köho rovade höjo. Jabumëro jasi aribövioho muo'amamu köho rovë'ego ëhuni jero jabesi örire köe mana bojëmijane höjo ue'aho'iröhego. Jabumë sisë'i ë'arohuni ëhuni ëhi jië'oho iae mae höjo. <sup>7</sup> Ëhi ua'ego God-ni suvuro vënehu buejहारue maratuore uavavohijo: Io'ajo. Bada God ja daruge aho'o baejë'e ae javajëjo. Jaehu a gëromo i'u mana bojëmijanuoho ëho bogo mu sisëho vae'iro iae mu mae vaejanue höjo.

<sup>8</sup> Ëhi uvo'ego urimo anerae niö'i gemuehu vörö otehö'öjaroho röhu number 4-huro ramare vöröho maja nunire otehö'öhijo. Otehö'ö'ego God-ro maja nuni hesi öroho bogo tugohohijo majaëro vörö'iraeromo ae aho'o jabesi sino haho'oho vënëro ravëvanovoröhego. <sup>9</sup> God-ro maja nuni hesi öroho bogo tugohë'ëro majaëro sisë maro nijëmiromo vënëro ravëvanovo'ego ë i'u nugö'öjade aho God agoruomohijo. Jabumë jabesi mu sisëho bogo vuonugoromo bogo uvoruomohijo: God-are ihoho böröme höjo.

<sup>10</sup> Ëhi'ego urimo anerae ëhi niö'i ëhi niö'iehu vörö otehö'öjaroho röhu number 5-huro mi sisëhu börömo vaeromo hijaje hesi döre ë ramare vöröho otehö'öhijo. Otehö'ö'ego ë mi sisëhu muebejaje öri ari'oho ramoramovohijo. Ramoramovo'ego ae aho'obëhe hara'uoromo anëro bitaroho ja'ihorovo'amohijo. <sup>11</sup> Anëro bitaroho ja'ihorovo'amë'ëro jabesi vi'ehohu'o sagoho sagohohu'o uehorovoromo ö'idöre hijaje aho God hesi örire agoruomohijo. Jabumë mu

sisë vaeruomadoho bogo uehorovoromo vuonugoruumohijo.

<sup>12</sup> Ëhi'ego urimo anerae övo gö minehu vörö otehö'öjaroho röhu number 6-huro ramare vöröho rova'ë'e jovo böröme Euphrates-are döre otehö'öhijo. Otehö'ö'ego jovoho sinihohijo ëhuro ruhe maja rojomajinö jioromo rueröhe a masijo jabesi öroho jiovëhego maro rueromo muorovoruomoröhego. <sup>13</sup> Ëhi'amu naro gavodeje aru'aho sisë niö'i gemu vahuno va'ënoho göhuro sigobu börömo hesi jö'ore jioromo göhuro mi sisë hesi jö'ore jioromo göhuro sareri'e aru'aho'e jö majëhijaje a hesi jö'ore jioromo suorovoromo rueruomamu. <sup>14</sup> Ëaru'aho sisëho jabumë Satan-are anera sisëro jioruomë'ëro bogo gavarue darugo'e muoho vaeruomajeje. Darugo'e muoho vaeromo sa'ae dinö'e dinö'e va'arueje sa'are masijo vaejarue aribövioho aho'obëhe gagovëvego daruge aho'o baejë'e aho God-are maja börömoho rovego muorovoruomoröhego.

<sup>15</sup> Röhu Iesuro uve: Jöe hehëjo. Naro vajiohu'e aëro ö'anovo'ië'ajëjo. Ëhuni ae rahu nune jioromo niögu avo'avoho mueberovë'oho iae mae jioruomö'ajëjo. Ëhi jië'o'oho bogo masinëremuoho a nuniroho jijihoromo javojoho baeruomö'ajëjo. Iesuro ëhi uve.

<sup>16</sup> Amo ë aru'aho sisë niö'i gemu jaburo sa'a muebejarue a masijoho sö ujuohëvo rueromo öri ari'o ihe Hebrew jöehu uvaruoho Armageddon ë gagovëvohijo.

<sup>17</sup> Gagovëvo'ego urimo anerae övo gö mine övo göre gemuehu vörö otehö'öjaroho röhu

number 7-huro ijo tugoho'i ramare vöröho sa'anö otehö'öhijo. Sa'anö otehö'ö'ego God-are osa börömore jiaje röho mare uvavohijo: Iae barëjê'e höjo. <sup>18</sup> Iae barëjê'e hö uvo'ego baderivoromo vajeri varuru'e vaeromo sa'aho sisë maro hijiohijiovohijo. Aevoromo aehu sa'are raromobe rovaroho sa'aho bogo ëhioho darugo'e maho hijiohijiovo'i ma-bisemu jiobe rovadeje. <sup>19</sup> Sa'aho hijiohijiovo'ego amo börömoho niö'i gemu tariorovobe va'ohijo. Tariorovobe va'ego ame gö gö sa'ae dinö'e dinö'e jio'amajoho sisërë'amohijo. Röhu God-ro amo böröme Babylon hesi sisëho bogo rumonimo'i vörö'iraeromo i'uoho amo rajoho bojëmihijo ëhuro aehu vörö'e jovo ue'ahoromo hara'uaruëhi ë i'uoho baeromo ëhi hara'uoruumoröhego. <sup>20</sup> Eï'uoho bojëmi'ego sa'a dirö dirö'e jio'amajoho dahore aho'obëhe sisërëromo ëhi va'o barë'amohijo. <sup>21</sup> Röhu ënëro direjohi'amë'e masijo masije ruvebihijo. Ehesi i'uoho gemu gemu 50 kilo rabu'e jio'amë'ëro ëhuro ruvebiromo ae taemo'amoromo ijumëvohijo. Sisë maro ijumëvo'ego jaburo God agoruomohijo.

## 17

*Önö'e juvaje magonaho börömo hesi jöhoje.*

<sup>1</sup> Ehi'ego anerae aho'obëhe 7 rama ujuharoho röhu gemuëro rueromo uehijo: Rovego na röjahego önö'e juvaje magonaho börömehu i'u baejajoho gavëjo. E'magonahoho ruë numë jovemu jîë'e öri ari'ere hijaje höjo. <sup>2</sup> Urimë'i

a masije aho'obēhe sa'ae dinō'e dinō'e muebe-  
 jaruoho ēho jaburo ē magonahoho sihonōvare  
 hōjo. O ae aho'obēhe sa'ae dinō'e dinō'e raro-  
 maruoho ēho jaburo hesi jōho ejahoromo hesi  
 vōrō'e jovoho ue'ahoromo simane sisērōromo  
 hu'o mu sisēho vaenōvare hōjo. Ēhuni rovego na  
 rōjahego huhu i'u baejajoho gavējo.

<sup>3</sup> Ēhi uenugoromo God-are Aru'ahohuro nasi  
 simanoho huotovehamu ē anerahuro na bae-  
 jevoromo a rumo'e sa'are ruehijo. Baejevoromo  
 rovanu naro gavodeje magonahoho sino kavuē'e  
 mi sisē hesi dōre hijamu. Rōhu mi sisē hesi  
 sinore iho sisē God agaruoho jajivo'amē'e jio-  
 hijo. Hesi simanoho aho'obēhe 7 jio'amohijo.  
 Hesi danoho aho'obēhe 10 jio'amohijo. <sup>4</sup> Rōhu  
 ē magonahohuro kavuē'e niōge nu ano'e gō  
 gō jiē'oho ruahē'e gold mabēhēro aji'e munē  
 mabēhēro nieniae gō gō mabēhēro ēhuro gurasi-  
 jiomoromo avohorovē'e hihijo. Hiromu gold'e  
 enatuoho övōro ma'enuhijo. Ēenatu gagoho ē  
 magonahehu va'inumi'e mu gō gō vaejaje ē  
 hesi va'inumohuro irijiomē'e usihō'e sisē bēhe  
 jiohijo. <sup>5</sup> O magonaho hesi ihoho hesi vari-  
 jore uhu'e jajivoromo uvē'e jiohijo: Ave mago-  
 naho hesi bēhoho amo bōrōmoho Babylon hōjo.  
 Önō'e jijiharue mu gō gō vaejarue sa'ae dinō'e  
 dinō'e raromarue aribōvi jabesi vēmoho hōjo.  
<sup>6</sup> Rōhu na gavodeje ē magonaho hesi simanoho  
 huotorovoromo sisērējē'e jiamu ē hesi bēhoho  
 huro God-are aribōviehu Iesuarue jō biririvo-  
 romo majēhijaroho muo'amoromo jabesi kōho  
 ibe rovē'ero. Ēhu'ero jiē'ero simanoho sisērējē'e

jiohijo.

Simane sisërëjë'e jiamu gagorovo na tiötiövevadeje. <sup>7</sup> Tiötiövevamu gegerovo rue anerahuro uehijo: Ja rabëni tiöjanuëjo. Ëmagonaho hesi uhu jöho o magonahehu döre hijaje mi sisë simane 7 o dane 10 jiajoho è mi hesi uhu jöho huruoho majahi'ië'ajëjo. <sup>8</sup> Jaehu gavane mioho urimo namijade höjo. Röhu avevejö'oho bogohöjo. Röhu u'emu gua ëgobövi sa'a gagore jio rojomo'ië'ajëjo ijonö sisëro va'iröhëro. Rojomo'iramu sa'are raromarue ariböviohuro tiöromo jöe barëjëvo'ajëjo. Urimë'i ö'idö sa'a bogo bamadevare evare God-ro maro raromemu raromo'iröhe surire a ioro'ioro jabesi ihoho jajivo'i a ioro'ioro jabesi ihoho bogo jajivo'amade höjo. Jabesi iho bogo jajivo'amade ariböviohuro è mi sisëho garomo tiöruomo'ajëjo. Ëhesi bëhoho è mioho urimo namijadoho avevejö'oho bogojiajoho röhu ijonö röhu maho jio'a'ajëjo. Iae ëhuni tiöruomo'ajëjo.

<sup>9</sup> Röhu ae rahu ave jöho avo'avoho uehorovoromo simano mae baeromo bëhi nahë'oho ave nasi uhu jö hesi bëhoho biroho'arujëjo. Ëjëvode mi sisë hesi simane 7 ëho jabesi bëhoho dahore aho'obëhe 7 hesi jöho höjo. Ëmagonahohuro è dahore aho'o 7 jië'e hesi döre hijanovaje höjo. Röhu simane 7 jabesi bëhoho gö sa'are masijo vaejarue ae 7 jabesi jöho höjo. <sup>10</sup> Övo gö mine rireromadoho gemu avevejö'oho daruge jioromo hi'i röhu gemu gö'o bogo rovë'e höjo. Rovë'iroho iae majae ma-bisemu hi'a'ajëjo. <sup>11</sup> Röhu mi sisë urimo namijë'ëro jaruvo bogojiaje

hesi bēhoho a masije 7 jabesi jō uavode rōhu ē hesi ijore number 8-ehu ruerōhe hesi jōho hōjo. Rōhu ēho urimo riravobe rovarue a masije 7 jabesi ae gemuoho jio'a'ajējo. Rōhu hu sisēro va'a'ajējo.

<sup>12</sup> Rōhu mi hesi dane 10 gavanoho ē hesi bēhoho sa'a muebejarue a masije 10 jabesi jōho hōjo. Rōhu avevejō'oho mueberuomo'irōhe ōri ari'oho bogo baerumē'e hōjo. U'emu bae'a'aruējo. Jabesi muebe'irōhe ōri ari'o baejē'iroho evare a muebejēvo'irōhe darugoho bae'a'aruējo mi sisēhu'o gemu mae masije riravoromo ae muebejēvego majae ma-bisemu jioromo evare ē darugoho barējēhorōhego. <sup>13</sup> Ēa masije aho'obēhe 10 ēho jaburo uehore gemu bae'a'aruējo. Uehore gemu baeromo jabesi darugoho aho'o mi sisē hesi ōrire gemu bojamiromo ajaminōvo'aruējo. <sup>14</sup> Mi sisēho ajamiromo ri'ōromo God-are Sheep Harihohu'o muorovo'aruējo. Muorovo'iramu Sheep Harihohuro mana muorovēmiromo jabumē ruahō'ōjēvo'ajējo ē hesi bēhoho huro masijo vaeruomaje ae aho'o iosirēmiromo hu gemu dōroho jiē'ēro. O huhu baejēvo'i uehorovēvoromo hesi baejēvade aribōviehu hu gemu biririvoromo uehorovarue ē aribōvioho jaburo Sheep Harihohu'o gemuoro bimuvoromo muorovoromo sisēho ruahō'ōjēvoruomo'ajējo.

<sup>15</sup> Anerahuro ēhi ueromo uehijo: Ōnō'e juvaje magonahehu ruē numē jovemu jiē'ire hijamu gavane jovo hesi bēhoho ae aho'obēhe sine gō gō huē gō gō sa'ae dinō'e dinō'e raromarue aribōvi jabesi jōho hōjo. <sup>16</sup> Rōhu mi sisēhu'o hesi



dane aho'obëhe 10 ga'amanoho ëhu'o jaburo huotorovoromo ë önö'e juvaje magonahoho nue huodivoromo ijumo'aruëjo. Ijumoromo niögu siri'oho jahaho'amo'iramu dë'ahobatëremu jio'iramu ëhi nugoruomo'ajëjo. Dë'ahobatëremu nugonugoromo hesi sino ioro'ioroho ue'aho'i ioro'ioroho vëniro huoruomo'ajëjo. <sup>17</sup> Ëhi ë'iröhe hesi bëhoho God-ro uehore ë danoho simanore bojëmijade höjo ëhuro huhu nimaje muoho vaejahoruomoröhego. Huhu nimaje muoho jabumëro vaejahoromo simane gemuoho uehorovoromo mi sisëho jabesi darugoho aho'o bojamiromo ajamijego ë mi sisëhuro bövie namiromo öri ari'oho muebebe va'ego evare God-hu rabe rabe uëvadëhi ëhi jioröhego.

<sup>18</sup> O jaehu gavane magonaho hesi bëhoho iho'e amo börömoho höjo. Ëamohuro sa'ae dinö'e dinö'e muebejarue a ioro'ioroho muebe'amarue höjo.

## 18

*Amo sisë Babylon ma-ioro'ioremu sisëre barë'iröhe jöhoje.*

<sup>1</sup> Ëhi'amu gagorovo gavodeje anerae gö ö'idöre jioromo ruvebijamu. Hu darugo böröme baejë'ero ruvebi'ego hesi ajohuro sa'ae aho'obëhe ajivo'amohijo. <sup>2</sup> Sa'ae aho'obëhe ajivo'amo'ego ma-darugo'o uvohijo: Amoho barëjë'e höjo. Iho'e amo börömoho Babylon vejö'oho barëjë'e höjo. Avevejö'oho ë amoho Satan-are anera jabesi ame höjo. Aru'aho sisë jabesi öri ari'e höjo. Va'inumi'e ugo sisë ihe

göero göero ë raromo jijiharue höjo. <sup>3</sup> Èhesi bëhoho ëhi höjo. Aehu magonaho hesi vörö'e jovo iromo simane sisërëromo hu'o önö'e vaejarue ëhi jïë'e mue gemuoho ë amo rajoho jaburo sa'ae aho'obëhe røjëhijare höjo. Aehu magonaho'o önö'e mu vaejaruëhi sa'are a masijo ömo'ömohuro ë amo gemuore bimuvoromo javoji'e mue gö gö vaejare höjo. O Babylon amo rajohuro mahunö'e raromoromo bövie bise'e imo'i nimare höjo. Èhi nimë'ëro inömo imo'amarue ariböviohuro sa'ae göro göro jioromo rueromo ë amore jabesi inömoho imoromo ehuro moni ma'e jëvade höjo.

<sup>4</sup> Èhi uvavamu hejë'i hejodeje ö'idöre huë gö uvavamu:

Nasi aribövioho ë amore raromarujoho vuonugo'i ruehëjo

ëhuro ë amo rajo jabesi gemuoroho bogo bimuvoromo mu sisëho vae'irarije höjo.

O jabuhu i'u baeruomajoho jemë bogo bae'irarije höjo.

<sup>5</sup> Èamo rajehu mu sisë börömo bëhe vaebe rovaroho

God iae uehorovajëjo i'ue bojëmi'iro.

<sup>6</sup> Amo rajehu mu sisë vaeruomadëhi jemëro i'uoho mana ëhi bojëmiromo röhu gö'o döro börömo bëhe bojëmirëjo.

Jabuhu a ioro'ioro vörö'e jovo bojëmanovamu ue'ahoromo ijumorovarëhi

jemëro ëhi mana bojëmirëjo.

Röhu vörö ma-ma'e jovoho bojëmego ue'ahoromo ijumorovo avoho'irarëjo.

<sup>7</sup> Urimo amo rajehu nimoronimorohë'i jijihoromo mahunö'e raromarëhi

i'uoho mana ëhi bojëmego hara'uoromo huë  
vavaene baeruomo'irajo.

Magonahehu sarerivoromo uvajëhi: Na mago-  
naho börömëro jevë'ëro dö maro hijaje  
höjo.

Na bogo doruoho hijaje höjo.

Bogo mae bogo huë vavaenoho bae hesi jevajë  
uvajëhi

ë amo rajohuro ëhi gemuoho sarerivoromo ue-  
horovoromo uvoruomaje höjo:

No masije javuajëjo.

<sup>8</sup> Èhuni majae gemuore jabesi i'uoho  
aho'obëhe ma-majioho rue barë'iramu  
sisërëjëvo'ajëjo.

Ae guomo guomo sisë baeromo vuovëvo'ajëjo.

Huë vavaene böröme jabesi örire rue'a'ajëjo.

Hömo majae rue'a'ajëjo.

Vënëro ravëvo barë'ajëjo

ë hesi bëhoho jabumë mevo gëromo i'u bojëmaje  
aho Bada God-are darugoho börömëro  
jië'ëro.

<sup>9</sup> Röhu sa'a gö gö a masijohuro ë amo  
rajohu'o bimuvoromo javoji'e muoho vaeromo  
hesi inöme marohë'e mae ujuohoromo  
mahunö'e raromë'ëro garöhe amoho vënëro  
ravoromo u'ivo ajiomo'iramu garuomoromo  
amo hesi jöëni vavaenimoromo nierusuburu'e  
bamoruomo'ë'e. <sup>10</sup> Nierusuburu'e bamoromo ë  
amore huë vavaeni börömo baejaruoho garomo  
juhuonivoromo rori'o ëgoböviro riravo'ë'ö.

Riravoromo uvoruomo'ë'e:

Babylon vaevë'e amo börömhajo.

E-e vaevë'e biriri'e amohajo.

Jemesi i'uoho ma-majioho baejē'e jēvajējo.

<sup>11</sup> Ēhi uvoruomo'iramu sa'ae dinō'e dinō'e raromoromo inōmo imoromo moni mana ujuoharue ariböviohuro ē amo hesi jōēni vavaenimoromo nierusuburu'e bamoruomo'ē'e. Ēhesi bēhoho urimē'i ē amo rajehu imo'amarue a jabesi inōmo imo'amoromo moni bojēminōvaroho ē i'u baerōhe majare evare iae barē'ē'e. Barē'iramu ae bogojiē'ēro jabumē inōmoho bogo imo'amoromo monioho bae'ē'ō. <sup>12</sup> Jabesi gold silver munē gö gö maho nienia maho bogo imo'amoromo monioho bae'ē'ō. Sanuovē'e niōge kavuē'e nu ano'e gö gö ēhu'o bogo imo'amoromo monioho bae'ē'ō. Ridi'e ije nu ano'e gö gö ēhu'o bogo imo'amoromo monioho bae'ē'ō. Inōmo inōmo mi danehu avoho'amaroho ijo maehu avoho'amaroho rōvē'e munē maehu ajaniehu munē nu ano'o göehu göehu avoho'amaroho ēhu'o bogo imo'amoromo monioho bae'ē'ō. <sup>13</sup> Rihu'e i maho ridi'e oso ihe gö gö vēniro buejego ridivajoho o sino avohorovaruoho o mu rabe rabe vaejaruoho ēhu'o bogo imo'amoromo monioho bae'ē'ō. Wine jovoho olive ijo bajo jovoho flour-ho wheat-ho cow-ho sheep-ho horse-ho ēhu'o bogo imo'amoromo monioho bae'ē'ō. Maratu mabēhe horse-ehu jagu bava'aruoho ēhu'o bogo imo'amoromo monioho bae'ē'ō. Ae magonahe aru'aho'e jioruomajeje rōhu mahu mi'o ē'aruēhi ēhi guduamo'amoromo imo'amarueje ae gö jabesi muemu vaerōhego. Ae magonahe mi va'ēne imo'amaruēhioho ēhioho bogo imo'ē'ō. Ijonōho aho bogo imo'amo'iramu ēhuni imo'amarue ariböviohuro nierusuburu'e

bamoruomo'ë'e. <sup>14</sup> Nierusuburu'e bamoromo uvoruomo'ë'e: Vaevë'e amoho ijo baje gö gö i'li ganiganiëgajoho iae barëjêhë'e höjo. Jemë inöme marohë'e mae o bövie bise'e ajivë'e ma-mabëhe jëvadoho sisërëjêhë'e höjo. Dinö'e röhu maho bihorëjo. <sup>15</sup> Iae ë inömo amo rajo jabesi örire imo'amoromo mana marohë'e ma ujuoharohuro ë amo rajehu huë vavaeni vi'ehi börömo baejaruoho gëromo juhuonivë'ëro rori'o ëgoböviro riravo'ë'e. Ëgoböviro riravoromo huë vavaene baeromo nierusuburu'e bamoruomo'ë'e. <sup>16</sup> Nierusuburu'e bamoromo uvoruomo'ë'e: E-e vaevë'e vaevë'e amo börömohajo.

Sanuovë'e niögu mabëhe kavuë'e ma-mabëhe io'amonövarije höjo.

Nieniae gold-ehu inömo göehu göehu avoho'amaroho gurasijiomoromo avohorovonövarije höjo.

<sup>17</sup> Jaruvoho jemesi inömo marohë'oho mamajioho ijumëhë'e höjo.

Boat muebe'amarue aribövioho boat ma'enarue aribövioho boat-re raromoromo mu vaeromo moni baejarue aribövioho boat-re va'arue a ioro'ioroho ëho jaburo rori'o ëgoböviro riravoromo <sup>18</sup> garöhe Babylon amoho vënëro ravoromo u'ivo ajiomö'iramu garuomoromo ma-darugo'o uvoruomo'ë'e: Sareri amo börömo böröme jiade höjo. Ëhi jië'e amoho urimoho bogojiade höjo. <sup>19</sup> Ëhi uvoruomoromo vavaenimorovoromo tohotohoho jabesi simanore bu'ödivorovoromo nierusuburu'e bamoromo uvoruomo'ë'e:

E-e vaevë'e vaevë'e amo börömohajo.

Boat baeromo sö jovore va'arue ae aho'o noro ë  
amo rajore nosi inömoho imëvoromo

manaho marohë'e mae ujuohë'e javuajëjo.

Jaruvoho ma-majioho sisërëjë'e höjo.

Ëhi uvoruomo'ë'e.

<sup>20</sup> Röhu ö'idö rajoho apostle ömo'ömoho jö  
God-aro baeromo majëhijarue aribövioho God-are  
aribövi ioro'ioroho jemëro nimorohore. Ëamo  
rajehu jemesi örire sisë'i vaejëvaroho God-ro ëho  
gëromo ë hesi i'uoho mana bojëmijë'eje.

<sup>21</sup> Röhu darugo'e anerae gemuëro munë ha'osi  
börömo börömoho banigojiomoromo sö jovore  
bu'ö'ego jovo gagore be'abuehijo. Jovo gagore  
be'abue'ego anerahuro uvavohijo: Ëmunëhu  
e'ure be'abuejë'ëro ijonö bogo gavaruëhi amo  
börömo böröme Babylon i'ue baeromo ëhi ma-  
ioro'ioremu beva'oromo sisërë'iramu ijonöho  
bogo ga'a'anuëjo. <sup>22</sup> Gita bejaruoho jö iaruoho  
virikö huosiharuoho hëgö huaruoho ë hesi huëho  
ë amoroho ijonöho bogo he'a'anuëjo. Inömo  
javuo bövi bise'o avoho'amarue aribövioho  
ë amoroho ijonöho bogo birohëvo'anuëjo. I  
sa'ijovaje munë hunuohunuovo'ego garahörö'e  
baejajoho ë amoroho ijonöho bogo he'a'anuëjo.

<sup>23</sup> Iro buno'irae'ego ajivajoho ë amoroho  
ijonöho bogo ga'a'anuëjo. A'o magonaho'o  
masurovoromo nimoronimoroharuoho ë  
amoroho ijonöho bogo he'a'anuëjo. Röhu  
amo rajomë urimo jemesi moni mu vaejarue  
ariböviohuro sa'a ioro'ioroho iosirëmiromo  
masije jëvade höjo. Jemëro sareri sareri'e muoho

vaeromo sa'ae aho'o jabesi uehoroho ijumëharije höjo.

<sup>24</sup> Röhu jö God-aro baeromo majëhijarue ariböviohu'o God-are aribövi ioro'iorohu'o ë amore o dinö'e dinö'e raromaruoho muo'amamu vuovëvë'o ho ë amo rajo jabesi sisë höjo. Iae ëhuni ë amoho sisërë'ajëjo. Anerahuro ëhi uvohijo.

## 19

<sup>1</sup> Ëhi'amu hejodeje ae aho'o ö'idöre ma-darugo'o uvoruomavamu: God mabëhëjo. Huro gemuëro maroho bamavuaaje höjo. Iho börömoho darugo maho nosi God hesiriremu höjo. <sup>2</sup> God-ro ae mae o sisë jëvego gë'i avoho mevëvaje höjo. Ëhesi bëhoho ë önö'e juvaje magonaho börömehu sa'ae aho'o javoji'e mu röjëhiromo ijumëvadohuni ëhuni huro mevoromo uavade höjo: Sisë javo'ego sisëro va'a'anuejo. Ëmagonahehu God-are mu vaejarue aribövi muo'amëvadohuni ëhuni i'ue mana bojamijë'e höjo. <sup>3</sup> Ëhi uvoruomoromo röhu maho uvoruomohijo: God mabëhëjo. Ëamo börömoho vënehu ravaje u'oho ëhi ma-ajiomemu ajiomo'ajëjo. <sup>4</sup> Ëhi uvoruomo'ego rue a duvahe aho'obëhe 24-ho o God rajahijarue maje 4-ho jaburo sa'are ague aho raromoromo God-hu röho mare hijajoho rajahiromo uaruomohijo: Ëjöho iae mae-ëjo. God mabëhëjo.

*Masu'iröhe sörö God-are Sheep Harihehu bae'iröhe jöhoje.*

<sup>5</sup> Ëhi uvoruomo'ego God-are röho mare uvavohijo: Nosi Börömoho God mabëhe uarëjo. Hesi

mu vaejharuje hu uehorovaruje aribövi masi-johu'o ininohu'o aho'o hesi öroro huë mae uarëjo. <sup>6</sup> Ëhi uvoruomamu hejë'i naro hejodeje ae aho'obëhe uvorovaruëhi jovehu ruomoromo uvajëhi varurehu anego hejaruëhi ëhi uvoromo uvavamu: God mabëhëjo. Bada nosi God daruge aho'o baejë'e ahuro böröme namijajëjo. <sup>7</sup> Ëhuni ë'ego no huë mae baeromo nimoroharëjo. Hesi ihoho mabëhe uavarëjo. Ëhesi bëhoho God-are Sheep Harihehu masu'iröhe majaho rovë'e höjo. Huhu masu'iröhe magonahohuro avohorovë'e höjo. <sup>8</sup> God-ro sanuovë'e ajivo avohë'e niögoho bojamamu ba'amë'e höjo. Ëhi uvoruomavohijo. Röhu sanuovë'e niögu hesi bëhoho God-are ariböviehu mu ma vaejarue hesi jöhoje.

<sup>9</sup> Ëhi'ego ë anerahuro uehijo: Ave jöho jajivoromo uvonëjo: Ae rahu hejë'oho uëvamu: God-are Sheep Harihehu masu'iröhe söröho ro ihë uëvamu hejë'oho huë mabëhe jioruomo'ajëjo. Ëhi uenugoromo uehijo: Ave jö hejanuoho God-are jö maho höjo. <sup>10</sup> Anerahuro ëhi uevamu hejë'i naro hu uvene aho röjahi'irögoro hesi hörü'ere ague aho hijodeje. Hiromo rajahi'irögoro ë'amu gegorovo uehijo: Bogave ëhioho ë'iranëjo. Jaehu God-are mu vaejanue ëhi jië'e mu vaejaje ae jevajëjo. O jasi ö mueno'ohu'o Iesuarë jö mae uehorovoromo majëhijaruoho jabuhu Badare mu vaejaruëhi na'o ëhi ë'aje ae jevajëjo. Ëhuni nadi na rajahi'i God gemu rajahijëjo. Ëhesi bëhoho Aru'aho gemuhuro jöe bojëmë'ego aëro ijönö jioröhe jöho majëhinövare höjo o avevejö'oho



Iesuare jöho majëhijarue höjo.

*Mu Ma Uehorovaje Aehu sino ajivë'e horse-re hirono va'oromo sisë ariböviohu'o muorovade jöhoje.*

<sup>11</sup> Èhi uevamu gavodeje ö'idöho jiovë'e jiamu. Jiovë'e jiamu gagorovo gavodeje ae sino ajivë'e horse-re hijamu. Èa hesi ihoho Biririvoromo Mu Ma Uehorovaje Ahoje. Hu mevoromo gövuaje a mae o sisë javuego gövuajoho èho huro mae uehorovoromo ë'ajeje. O muorovajoho èhu'o huro mae uehorovoromo ë'ajeje. <sup>12</sup> Röhu hesi nunoho vënëro höduvanovohijo. O hesi simanore a masijehu didi'aruëhi jië'e bosöho aho'obëhe didi'o'amë'e jiohijo. Röhu hesi sinore ihe jajivë'e jiohijo. Ae gö ë iho hesi bëhoho bogo ga'i hesi huro sivue gavajeje. <sup>13</sup> Hu köëremu jië'e niögoho ba'amë'e jiohijo. Röhu hesi ihoho God-are Jö jumuvë'ohoje. <sup>14</sup> Röhu ö'idöre jioruomaje muorovo ariböviohuro aji buse jië'e sanuovë'e niögoho io'amoruomë'e sino ajivo'amë'e horse-re raromoruomohijo. Raromoro ë a börömo hesi ijore ijore jijihoruomohijo. <sup>15</sup> Röhu ë a hesi jö'ore anio ma'e kaejöhö jiohijo èhuro God bogo uehorovarue aribövi sa'ae dinö'e dinö'e raromaruoho ruahö'öjëvoröhëro. Ruahö'öjëvoromo hujejo ha'itoho baeromo vörö'o muebejëvo'ë'e jaburo hu gemu ejahoruomoröhëgo. Muebejëvoromo aehu kavuë'e ö'i bajo munë guorötore hörehu taemotaemovoromo sa'ijovo'amaruëhi huro sisë aribövioho èhi hörëro taemotaemovo'amo'ë'e. Èhesi bëhoho daruge aho'o bæjë'e aho God-hu

dē vörönimego vörö röjëhiromo i'u bojëmijaje jöhoje. <sup>16</sup> Röhu hesi ahihonö niögu döre ihoho jajivoromo uvë'e jiohijo: Masijo vaeruomaje ae aho'o iosirëmiromo hu gemu döroho höjo. Ëhi jajivë'e jiohijo.

<sup>17</sup> Ëhi'amu gavodeje anerae gemu maja nunire namijamu. Namiromo döre bioromo va'arue ugoho aho'obëhe ma-darugo'o uëhijo: God sörö böröme bamajëjo. Rueromo gemuoro gagovohëjo <sup>18</sup> ëhuro sa'are masijo vaejarue a jabesi birogoho iromo muorovo a masijo jabesi birogoho darugo'e a jabesi birogoho horse jabesi birogoho horse-re va'arue aribövi jabesi birogoho mae o sisë'i raromarue aribövi jabesi birogoho a masijo o a inino jabesi birogoho ëho i'amo'irarije höjo. Ëhi uëhijo.

<sup>19</sup> Röhu gavodeje urimo gavode mi sisëho o sa'ae dinö'e dinö'e masijo vaeruomaje aribövioho o jabesi muorovo aribövioho ëho jaburo ë sino ajivë'e horse-re hijaje a börömohu'o hesi muorovo ariböviohu'o muorovo'i gemuoro gagovë'e jiamu. <sup>20</sup> Muorovo'ego horse-re hijaje a börömohu'o hesi muorovo ariböviohu'o ëho jaburo mi sisëhu'o mi sisë hesi sareri'e aru'aho jö majëhijaje ahu'o ëhi guduamo baejëvo va'ohijo. Urimë'i ë jö sareri'e majëhijaje ahuro mi sisë hesi jöho ae sarerëmiromo darugo'o majëhiromo mi sisëhuni röromo noehu bogo gavarue darugo'e muoho vaenövadeje. Darugo'e muoho vaeromo ëhuro aho sarerëmi'ego ae rahu mi sisë hesi iho sinore baeromo hesi nu ano'o va'ëne inömo avoharoho uvene aho röjahijë'oho guaro

rireromo va'onövareje. Amo ë sareri'e aru'aho jö majëhijaje ahu'o mi sisëhu'o guduamëvoromo bogo anëgo'i ma-babu'öjëvo'ego vënehu munë ravoromo girosijiomoromo e'u börömo va'ëne jiajire ë bejëvo va'ohijo. <sup>21</sup> Bejëvo va'ego jabesi muorovo aribövi sisëho horse-re hijaje a börömo hesi jö'ore jioromo höröjade kaejöhuro muo'amohijo. Muo'amo'ego uge aho'obëhe ë aribövi jabesi birogoho ue'ahë'ëro dë bajo'e jio'amohijo.

## 20

*Satan gua gagore vadune ëgobövie hi'iröhego tövoromo gua gago ëgobövire ba'amamu John-hu gavade jöhoje.*

<sup>1</sup> Naro gavodeje aneraho ö'idöre jioromo gua ëgobövi hesi ojo jiovarue key'o biriri'e ö'ohu'o övëro ömëvë'e ruvebijamu. <sup>2</sup> Ruvebiromomo ë anerahuro ni'i'ivadire jiobe rovade sigobu börömo hesi ihoho Devil o Satan ë sigoboho guduamoromo tövohijo ëhi jiobe va'ojuvo vadune aho'o 1,000 barë'iröhego. <sup>3</sup> Tövoromo ë gua ëgobövire ba'amo'ego beva'ohijo. Beva'ego ojoho tugohoniagivoromo sivaëro badihi taemohijo ëhuro hu bogo höröromomo urimo ë'adëhioho sa'ae dinö'e dinö'e raromarue aribövioho sarerëmibe va'ego vadune aho'o 1,000 barë'iröhego. Röhu vadune aho'obëhe 1,000 barë'iramu evare ojoho jiovaho'iramu iae höröromomo hibe juvoromo majae ma-bisemu barë'iramu evare barë'ë'e. Ëhi jio'ë'e.

4 Ĕhi'amu gavodeje a masijoho rōho mare raromamu. God-ro urimo uēvamu darugoho baeruomadeje ae mevēvoromo gērōhēni mae o sisē jēvego. Ĕaribōvioho rōho mare raromoruomohijo. O gavodeje a ioro'ioro jabesi aru'ahoho jio'amamu. Urimē'i ē aribōviohuro sa'are raromoro God-are jō Iesuhu majēhijadoho ae majēhibe jijihamu gagorovo aēro ē mu maho bijōnimoromo sōnōe tarivēhamu vuovēvadeje. Vuovēvē'ēro ē aribōvi jabesi aru'ahoho gēvodeje. Urimē'i ē aribōvioho jaburo mi sisēho o ē mi hesi nu ano'o va'ēne avohare inōmoho bogo uvene aho rōjēhijareje. Ĕmi sisē hesi ihoho varijore o övore jajivēho'irōhoho bijōnēgamu bogo baejareje. Bogo baejē'ēro vuovoromo i'ovē'ēro Keriso'o gemu mae masije vaejuvo vadune aho'obēhe 1,000 barēhijo. <sup>5</sup> A ioro'ioroho bogo i'ovo'i ma-vuovo momorō'ōjuvo vadune aho'obēhe 1,000 barē hesije. A'i naehu gēvode aribōvioho i'ovoromo ri'ōjē'e raromoruomohijo. Jabuhu i'ovoromo ri'ōjare hesi bēhoho urimo ri'ō'irōhe majahojē. <sup>6</sup> Urimo i'ovoromo ri'ō'irōhe aribōvioho huē mae jēvo'ē'e. God-are aribōvi maho jēvo'ē'e. Urimo vuovēvadoho rōhu maho bogo vuovoromo sisēroho va'i a'i God-are o Keriso-are priest muoho vaeromo Keriso'o gemu mae masije vae'iramu vadune aho'obēhe 1,000 barē'ē'e.

*Satan ruahō'ōromo vēni ravajire ē bu'ō'irōhe jōhoje.*

<sup>7</sup> Vadune aho'obēhe 1,000 barē'iramu Satan jiovo nugō'ō'iramu hörōromo va'ē'e. <sup>8</sup> Hörō

va'oromo Gog sa'are Magog sa'are sa'ae dinö'e dinö'e ae sarerëmibe muorovojöro gagovëvobe va'ë'e. Sarerëmibe gagovëvobe va'iramu ae aho'obëhe muorovo'i gagovo'iramu nie'u va'ëne jio'ë'e. <sup>9</sup> Nie'u va'ëne jië'ëro sa'ae bövioho ruë numë tagavoromo God-are aribövie hesi amo börömore riravaruoho muorovëmi'i numëvo'ë'e. Numëvo'iramu vënëro ö'idöre jioromo ruvebiromo ravëvo barë'ë'e. <sup>10</sup> Ravëvo barë'iramu Satan ë aribövi sarerëmiromo gagovëvade aho babu'ö'iramu vënehu munë ravoromo girosijiomoromo e'u börömo va'ëne jiajire be'abue'ë'e. Urimo mi sisëhu'o hesi sareri'e jö majëhijaje ahu'o ba'amëvego abo rireromo'iröhire ë be'abue'ë'e. Be'abueromo mi sisëho o sareri'e jö majëhijaje aho o Satan ëho jaburo vae majae hara'uemu hara'uobe va'ë'ö.

*Äe aho'obëhe God-are nurire riravego jabsi muoho mae o sisë jiego God-hu ma-ioro'iolemu mevoröhe jöhoje.*

<sup>11</sup> Ëhi ë'ë'ö. Röhu gavodeje a masijehu raro-marue ëhi jië'e ajivë'e röho börömore ae gemu hijamu. Hi'ego aehu huruomo va'aruëhi sa'ahu'o ö'idöhu'o ëhi arua anumiae va'ego röhu ijoho bogojiohijo. <sup>12</sup> Ëhi'amu gavodeje vuovëvë'e aribövioho ininore va'o masijore ë röho ma hesi nunire riravamu. Riravo'ego suri suri-oho jiovo'amohijo. Röhu suri suri göho ëho maro raromemu raromo'iröhe aribövi jabsi iho jajivo'amë'e suroho jiovohijo. O suri suri ioro'ioroho ëho ae aho'o mu vaebe rovere jöho jajivo'amë'e jiohijo. Ëröho mare hijaje ahuro

suri surioho adahohijo ga'i di ahuro mu maho vaej'e jiego di ahuro mu sisëho vaej'e jiego. Èho garomo uëhijo: Mu mae vaej'e javaje manö va'ëjo. Mu sisë vaej'e javaje sisënö va'ëjo. <sup>13</sup> Vuovare aribövi ioro'iorohuro sö jove iromo vuovo momorö'öj'ëro jië'ëro rojomoromo ioro'iorohuro vuovë'e ariböviehu raromaruire ë jioromo ri'öromo rueruomohijo. Rue'ego röho mare hijaje ahuro ae gemu gemu mevo garomo mu mae vaejadoho o mu sisë vaejadoho manaho ëhi bojami'ego baebe va'ohijo. <sup>14</sup> Röhu vuovarue vöröhu'o a vuovego bahjarue öri ari'ohu'o ëhu'o ma-ioro'ioemu bu'ö'ego vënehu ravoromo e'u börömo va'ëne jiajire ë abue'ego ijonöho vuovarue öroho bogojiohijo. Röhu vënehu ravoromo e'u börömo va'ëne jiaje hesi bëhoho ae rahu sisë vaej'ëro vuovoromo ri'öj'ëro röhu maho vuovoromo ë e'u va'ënire abueröhe jöhoje. <sup>15</sup> Ae rahu mae raromemu raromo'iröhe surire hesi iho bogojië'oho ëhi jië'e aribövioho ujuoho ruruhö'ö'ego e'u va'ëne vënehu ravajire ë rireromohijo.

## 21

*God-hu ö'idö sa'a bövi bise'o i'o avoho'iröhe jöhoje.*

<sup>1</sup> Èhi'amu gavodeje ö'idö i'ohu'o sa'a i'ohu'o jiamu ö'idö mamiohu'o sa'a mamiohu'o sisërë barëj'ëro. Sö jove urimo jiadoho bogojiohijo. <sup>2</sup> Èhi garomo gavodeje God-are amo böröme hesi ihoho Jerusalem amo i'e ö'idöre God-hu hijajire jioromo ruvebijamu. Magonahehu masu'irögoro

baruohuro gajöro sino avohorovaruëhi ë amo i'oho ëhi avohë'e jiohijo. <sup>3</sup> Ëhi jiamu gagorovo hejodeje röho mare ma-darugo'o uvavamu: Jöe hehëjo. Avevejö'oho God-are javu maho a ririro jië'ëro huro a'o gemu mae hinövo'ajëjo. Jabumë hesi aribövie jëvo'i huro jabu'o gemu mae hiromo muebejëvonövo'ajëjo jabesi Börömëro jië'ëro. <sup>4</sup> Muebejëvoromo nuni jovoho miorëho'ajëjo. Ijonöho aho bogo vuovëvo'i bogo nivö'i huë vavaenoho vi'ehoho bogo baeruomo'ajëjo mu mamioho mami'e barëjë'ëro jië'ëro.

<sup>5</sup> Ëhi uvo'ego röho mare hijaje ahuro uvavohijo: Jöe hehëjo. Naro bövie bise'e i'ëremu bamajëjo. I'ëremu bamajë uvonugoromo uehijo: Ëjöho bogo sareroho jio'i iae jö mae höjo. Ëhuni suroro jajivonëjo. <sup>6</sup> Ëhi ueromo uehijo: Muoho iae barëjajëjo. Na urimo ni'i'ivevadoho röhu ijo tugoho'ioho ëhi gemuoho jevo'ajëjo. Mue aho'o aevodoho ëhi vae barë'irodoho jevajëjo. Ae rahu huë girihëvë'oho naro sa'a gagore rojomaje jovoho vuoromo suvuore bojëmi'ejöjo ue'ahëgo i'ovëvo'iröhego. <sup>7</sup> Ae rahu mu sisë ruahö'öjë'oho aviëhi jië'e huë maho nasi örire bae'a'ajëjo. Na hesi Börömoho God jevo'i hu nasi harihe jio'a'ajëjo. <sup>8</sup> A'i juhuonivoromo mu vuonugarue aribövioho sareri sareri'e aribövioho mu sisë gö gö vaejarue aribövioho a muo'amarue aribövioho önö'e jijiharue aribövioho iro oso'e vaejarue aribövioho inömo sisë aru'aho'e höromo uvene aho röjahi'amarue aribövioho jö sareri'e atarue aribövioho aho'obëhe ëhi jië'e aribövi jabesi öri ari'oho e'u börömo va'ëne munë vënehu

ravoromo girosijiomajire ë jio'a'ajëjo. Ëhesi bëhoho ë aribövioho mami'e vuovëvadoho röhu maho vuovoromo ë va'o raromoruomo'ajëjo.

*Jerusalem amo i'o hesi jöhoje.*

<sup>9</sup> Röhu urimo anerae 7 ramare vöröho 7 otehö'öjamu evare bövie bise'e ijo tugoholi sisërë'amadeje. Mami'e ëhi ë'are anerae aho'obëhe 7 röhu gemuëro rueromo uehijo: Rovego na röjahijego Sheep Harihu hesi vaboro i'e masuvajoho gavëjo. <sup>10</sup> Ëhi uenugoromo God-are Aru'ahohuro nasi simanoho huotoveho'ego ë anerahuro baejevoromo dö mare ajiomoromo dahoru börömo ëgobövire ë ruehijo. Baejevo rueromo röjehijamu gavodeje God-are Amo Böröme hesi ihoho Jerusalem ö'idöre God-hu hijajire jioromo ruvebijamu. <sup>11</sup> Ëamohuro God-are ajoho baejë'ëro ëhu'ëro ajivohijo. Ajivoromo ma-mabëhe ajivo barëjë'e jiohijo. Munë mabëhe hesi ihe jasper ajivajëhi ëhi ajivohijo. <sup>12</sup> Röhu ë amo hesi rejoho ëgo ëgobövi mae jiohijo. Rejo hesi ojoho aho'obëhe 12 jio rova'ohijo. Anerae aho'obëhe 12 oje gemu gemu riravo rova'ohijo. Israel rajo jabesi agane 12 jabesi ihoho gemu gemu ojo ahore jajivo'amo va'ë'e jiohijo. <sup>13</sup> Maja höröjajinöho oje aho'o niö'i gemu jiohijo. Maja beva'ajinöho oje niö'i gemu jiohijo. Ruënöho niö'i gemu viënöho niö'i gemu ëhi jiohijo. <sup>14</sup> Ëamo rejo hesi uhuroho munë aho'obëhe 12 ruhë'e jië'ëro ëhu'ëro rejoho bibivoromo namihijo. Ëmunë ruho va'are ahore God-are Sheep Harihu hesi apostle ömo'öme 12 jabesi ihe gemu gemu jajivo'amo va'ë'e jiohijo.



15 Röhu na'o jö jövaje anerahuro gold-ehu avohare vahu baejaruoho övoro baejê'e jiohijo amo bövi hesi vahuoho o amo rejohu'o ojohu'o êho jabesi vahuoho bae'iröhëro. 16 Röhu ë amo börömoho ioni göho ioni göho ruhënöho numënöho vahuvojadoho hesi vahuoho magemuoho jiohijo. Anerahuro gold ahoho bava'oromo amo börömo hesi vahuoho vahuvo garomo gavadeje amo hesi ëgoho 2,400 kilometre jio'i hesi bunohu'o döre ajiomadohu'o jabesi vahuoho gemuoho jiamu. 17 O anerahuro amo hesi rejo vahuoho vahuvo garomo gavadeje rejo döre ajiomadoho 60 metre jiamu. Jabuhu vahuvo gavaruëhi ëhi gavadeje. 18 Röhu amo rejoho munë nu ano'o mabëhëro vaejê'e jiohijo. Munë hesi ihoho jasper-je. O amo bövioho ma-gold-ëremu avohë'ëro ma-ajëro jië'ëro ruënörïre öri ari'ohu'o ga'a'anue. 19 Röhu amo rejo bibivo'iröhego rejo uhure bahijare munëho munë mabëhe nu ano'e gö gö avohoromo bahijê'e jiohijo. Munë number 1 hesi ihoho jasper ajivê'e ma-mabëhe jiohijo. Munë number 2 hesi ihoho sapphire nuogu'e ma-mabëhe jiohijo. Munë number 3 hesi ihoho agate mahu guho'e jiohijo. Munë number 4 hesi ihoho emerald rövê'e ijo hano va'ëne jiohijo. 20 Munë number 5 hesi ihoho onyx hesi nu ano'e gö gö kavuê'e jionövo ajivê'e jionövohijo. Munë number 6 hesi ihoho carnelian kavuê'e jiohijo. Munë number 7 hesi ihoho quartz hövê'e jiohijo. Munë number 8 hesi ihoho beryl ijo hano va'ëne jiohijo. Munë number 9 hesi ihoho topaz hövo avohê'e jiohijo. Munë number 10 hesi ihoho chalcedony rövöromomo hövanövê'e jiohijo. Munë

number 11 hesi ihoho turquoise nuogu'e jiohijo. Munë number 12 hesi ihoho amethyst rövoromo kavuanovë'e jiohijo. Munë aho'obëhe 12 jabesi nu ano'e gö gö ëhi jio'amohijo. <sup>21</sup> Röhu rejo oje aho'obëhe 12 jabesi tugoharuoho ëho nienia ha'ose aho'obëhe 12 jiohijo. Oje gemu gemu nienia ha'ose gemu gemu ëhi jiobe va'ohijo. Röhu amo hesi öri börömoho ma-gold-ëremu avohë'ëro ma-ajëro jië'ëro ruënörire öri ari'ohu'o ga'a'anue.

<sup>22</sup> Röhu gavodeje God rajahjarue javu börömoho bogojiamu. Bada God daruge aho'o baejë'e ahu'o hesi Sheep Harihohu'o ëho jabu bëhi maro jëvë'ego ëhuni bogo osaremuoho rajëhi'i dinö'e dinö'e God'o hesi Sheep Harihohu'o ë rajëhiruomohijo. <sup>23</sup> O bëhoho rabëni majahu'o manaerohu'o ë amoroho bamoromo ajivojoro. God-are ajohuro amoho ajivoromo God-are Sheep Harihohuro iro va'ëne amoho ajivajeje. <sup>24</sup> Ajivo'iramu sa'ae dinö'e dinö'e raromarue aribövioho ë amo hesi ajire jijihonövo'ë'ö. Sa'are masije riravarue ariböviohuro jabesi bövie bise'e nu ano'o mabëhe gavaruoho ë amore ujuoho ruel'ë'ö. <sup>25</sup> Eamoroho vahioho bogojio'ë'e. Majae vahie bogojio'i mamajae jiemu jio'iramu amo rejo ojoho bogo tugohonövo jiovonövo'i ma-ëhi jiovo nugo'ë'ö. <sup>26</sup> Sa'ae dinö'e dinö'e raromarue ariböviohuro jabesi mu maho inömo maho ë amore ujuoho rueruomo'ë'e. <sup>27</sup> Va'inumie muoho bogo mae bogo barueruomo'ë'e. Mu sisë gö gö vaejarue aribövioho o sareri'e jö atarue aribövioho bogo ë amoroho rueruomo'i a'i mae raromemu

raromo'iröhe aribövi jabesi iho Sheep Harihu hesi surire jajivo'amade ë ariböviohuremu ë amoroho rueruomo'ë'e.

## 22

<sup>1</sup> Ëhi'amu iae ë anerahuro röjehijamu gavodeje a i'ovëvoröhe jovoho ajivo barëjë'e rova'amu. Jovoho God'o hesi Sheep Harihohu'o jabuhu ar-ijarue röho mare jioromo ruehijo. <sup>2</sup> Röho mare jioromo rueromo amore öri börömo hesi ririre rova'ohijo. Jovoho ririre rova'i a i'ovëvo'iröhe ijoho ionire ionire riravobe va'ohijo. Vadune gemu gemu röhu vae 12 12 bajoho ëhi rae-jajeje manaere gemu gemu. Ëijo hano hesi bëhoho sa'ae dinö'e dinö'e raromarue aribövi marëjëvo'iröhoho jiohijo. <sup>3</sup> A'i God-hu bijönimaje bövioho bise'oho ijonöho ë dirö'oho bogojio'ë'e.

God'o hesi Sheep Harihohu'o jabuhu masijo vaeromo arijarue röho maho ë jio'ë'e. God-are mu vaejharue ariböviohuro hu ë rajahinövo'ëlö. <sup>4</sup> Rajahiromo hesi nu ano'oho ganövo'ëlö. Hesi ihoho jabesi varijore jajivo'amë'e jio'ë'e. <sup>5</sup> Röhu vahioho ijonöho bogojio'ë'e. Iro hesi ajohu'o maja hesi ajohu'o ajivëvo'iröhe bëhoho bogojio'ë'e. A'i Bada God-are ajohuro ajivëvonövo'ë'e. Ajivëvo'iramu jabumëro ioro'ioemu masije rira-voromo öri ari'oho muebebe va'oruomo'ë'e.

### *Iesu rueröhe jöhoje.*

<sup>6</sup> Röhu ë anerahuro uehijo: Ave jöe aho'o he-januoho iae mae-ëjo. Bogo sareroho höjo. Bada God hesi Aru'aho a jabesi simanore bamëhego ae jö majëhijarue aho God-ro hesi aneraho na

remö'öjade höjo naro rueromo röjehijego hesi mu vaejaharuje ariböviohuro garomo uvo'irarijego: God-ro nimo'ego majae ijonöho ëhi ëhi jië'e muohuro nosi örire ruel'ie'ajëjo. Ëhi uehijo.

<sup>7</sup> Röhu Iesuro uve: Jöe hehëjo. Na ma-burëro ö'ie'ajëjo. God-are jö börömoho ave surire jajivë'e höjo. Ëhuni ae rahu ejë'oho huë mabëhe jioruomo'ajëjo. Ëhi uve.

<sup>8</sup> Röhu naehu jajivode jö hesi muoho aho'obëhe John naro heromo gavë'e jeve. Heromo ganugoromo ë mu röjehijade aneraho naro uvene aho röjahi'irögoro hesi höru'ere ague aho hijodeje.

<sup>9</sup> Ëhi'o'ego uehijo: Bogave ëhioho ë'iranëjo. Jaehu God-are mu vaejanue ëhi jië'e muoho vaejaje ae gemuoho jevajëjo. O jasi ö mueno'ohu'o jö God-aro baeromo majëhijaruoho o jaehu jajivanue surire jö ejaho'iröhe aribövioho jabuhu God-are mu vaejaruëhi na'o ëhi ë'aje ae gemuoho jevajëjo. Ëhuni nadi na rajehi'i God gemu rajahijëjo. <sup>10</sup> Ëhi uenugoromo uehijo: Ijonö jioröhe mu hesi jö ave suri surire jajivanuoho nadi subivëhonëjo ë hesi majaho dunovë'e jiaje. <sup>11</sup> Ae rahu mu sisë vaejaruoho ëhi vaemu vaebe va'oruomo'ajëjo. Ae rahu va'inumile mu uehorovaruoho ëhi uehorovemu uehorovobe va'oruomo'ajëjo. Ae rahu mu ma vaejaruoho ëhi vaemu vaebe va'oruomo'ajëjo. Ae rahu God gemu uehorovaruoho ëhi uehorovemu uehorovobe va'oruomo'ajëjo.

<sup>12</sup> Röhu Iesuro uve: Jöe hehëjo. Na ma-burëro ö'ie'ajëjo. Jemesi mu hesi suvuoroho ujuohoromo ö'ejöjo mu diehi diehi mae o bisemu

sisë'i sisë'i vaejarijëhi ae gö gö suvuoro ho ëhi bövie o bise'e bojëmi'irodëni. <sup>13</sup> Na urimo ni'l'ivevadoho röhu ijo tugoho'ioho ëhi gemuoho jevo'ajëjo. Na aevo'i jevadoho röhu ijonö jevo'ajëjo. Mue aho'o aevodoho ëhi vae barë'irodoho jevajëjo.

<sup>14</sup> Ae rahu niögu u'o'amaruoho huë mabëhe jioruomajëjo. Ëhi jië'e aribövioho naro uë'iramu a i'ovëvo'iröhe ijo hesi bajoho iromo amo rejo hesi ojoho ruahoromo amo börömore rueruomo'ajëjo. <sup>15</sup> A'i mu sisë gö gö vaejarue aribövioho iro oso'e vaejarue aribövioho önö'e jijiharue aribövioho a muo'amarue aribövioho inömo sisë aru'aho'e höromo uvene aho röjahi'amarue aribövioho sarerile mu nimoromo vaejarue aribövioho ëhi jië'e aribövioho ave amoroho bogo rueruomo'i marori'o jioruomo'ajëjo.

<sup>16</sup> Iesu naro nasi aneraho nugö'öjë'e jevajëjo ë jöho huruoho majëhijego ekaresiae gö gö he'irarijego. Na a böröme David-are ujoho jevajëjo. Sisonuvego ajivaje mujöroho va'ëne jevajëjo. Iesuro ëhi uve.

<sup>17</sup> Röhu God-are Aru'ahohu'o Sheep Harihehu i'e masuvade magonahohu'o jaburo niö'iro uvö: Ruehëjo. O ave jö he'irarije aribövioho jemë'o uvore: Ruehëjo. O ae rahu huë girihëvë'oho jemëro ruehe. Nimë'oho rueromo a i'ovëvo'iröhe jovoho ma-ire. Manaho bogojio'ë'e.

*Ijo tugoho'i jöhoje.*

<sup>18</sup> Röhu John naro God-are jö börömo ho ave surire jajivë'e jeve. Ëhuni naehu jajivode jö

he'irarije ariböviohumë ave jö majëhi'ië'ajoho avoho here. Naehu jajivode jöho ae rahu gö'o döre ëma jajivë'ocho ave surire jajivode i'uoho God-ro ë aho bojami'ë'e. <sup>19</sup> O ae rahu uvë'ocho: John-hu jajivade jö ë hesi vituoho sisë höromo dodure bu'öjë'ocho God-ro uvo'ë'e: Ëhi jië'e aho sisë höromo dodure bu'ö'ë'e. Dodure bu'ö'iramu ave surire jajivode a i'ovëvo'iröhe ijo bajoho bogo i'ë'e. O ave surire jajivode God-are amo börömoroho bogo va'ë'e.

<sup>20</sup> John naehu jajivode jö mae hö uvaje Ahuro uve: Iae na ma-burëro ö'ië'ajëjo. Bada Iesu iae mae uvanue. De je rove.

<sup>21</sup> Bada Iesuro jemë aho'o huë baeromo ajëminövo'ë'e. Ahia mino'e.

**God-are Jögoru I'oho**  
**The New Testament in the Omie language of Papua**  
**New Guinea**  
**Nupela Testamen long tokples Omie long Niugini**

copyright © 1991 Wycliffe Bible Translators, Inc.

Language: Ömie (Omie)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 3 Mar 2023 from source files dated 9 Oct 2020

a68769b4-6180-5825-a17e-676d8f6a7efa